


Agjenda për Reforma Evropiane (ARE)

Dialog i Nivelit të lartë ndërmjet
Kosovës dhe Bashkimit Evropian

Raporti i Monitorimit të ARE-së
Janar-Qershor 2018



Hyrje

Procesi i integritit në Bashkim Evropian (BE) ka një kuadër të veçantë për vendet e Ballkanit Perëndimor, atë të stabilizim-asociimit i cili ka tri objektiva kryesore: stabilizimi politik i vendeve të BE-së, bashkëpunimi rajonal, si dhe tranzicioni në ekonomi të tregut. Procesi siguron që vendet të cilat synojnë integrimin në BE të miratojnë dhe zbatojnë direktivat, ligjet dhe standardet e BE-së.

Marrëveshja e Stabilizim Asociimit (MSA) është marrëveshja e parë kontraktuale në mes të Kosovës dhe BE-së, e cila vendos listën e reformave makroekonomike dhe ligjore dhe afatet zyrtare për zbatimin e tyre deri në anëtarësimin eventuale të Kosovës në të. MSA është nënshkruar me qëllim të forcimit të demokracisë dhe shtetit të së drejtës, të stabilitetit politik, ekonomik dhe institucional, rritjes së bashkëpunimit rajonal dhe arritjen e tregtisë së lirë me BE-në.¹

Agjenda për Reforma Evropiane (ARE) është proces i dialogut të lartë në mes të Qeverisë së Kosovës dhe Komisionit Evropian (KE) në të cilin janë vendosur prioritetet kryesore të Kosovës në kuadër të MSA-së, të cilat do të duhej të përfundonin deri në fund të vitit 2017. Në dokumentin e dakorduar janë përfshirë gjithsej 22 masa të përgjithshme në fushën e (I) qeverisjes së mirë dhe sundimit të ligjit, (II) konkurrueshmërisë dhe klimës së investimeve, si dhe (III) punësimit dhe arsimit.² Objektivat e Agjendës për Reforma Evropiane janë të harmonizuara me ato të Programit Kombëtar për Reforma në Ekonomi³, dokument ky që përfshin reformat e politikave makro-ekonomike dhe fiskale të Kosovës.

Duke marrë parasysh zhvillimin e ulët ekonomik të Kosovës, nivelin e lartë të papunësisë, ekonominë jo-formale, deficitin e lartë tregtar, sundimin e ulët të ligjit, nivelin e lartë të korrupsionit si dhe zgjatjen e proceseve gjyqësore, kjo agjendë ishte rrugëdalja për të mobilizuar institucionet relevante për hartimin e ligjeve dhe programeve që do të siguronin reforma urgjente ekonomike. Në mënyrë që të shfrytëzohen mundësitë e ofruara përmes MSA-së, priorizimi i këtyre objektivave ishte i pashmangshëm.⁴

Qëllimi i këtij raporti të monitorimit të ARE-së është vlerësimi i arritjes së objektivave të mbetura të ARE-së të parapara që të finalizohen gjatë vitit 2018, sipas vendimit nr. 01/13 të Qeverisë së Kosovës për prioritetet kyçe të Agjendës Evropiane për vitin 2018.⁵ Të gjitha të dhënat e mbledhura dhe analizuara janë të detajuara në matricën e mëposhtme, ku vlerësohet puna e institucioneve përgjegjëse për përbushjen e 11 objektivave të mbetura për shtyllën e parë, 12 objektivave për shtyllën e dytë dhe gjashtë objektivave për shtyllën e tretë.

Një raport të ngjashëm e kemi publikuar edhe në muajin prill të këtij viti, i cili shfaq të arriturat e Qeverisë së Kosovës, në veçanti të institucioneve të ngarkuara me arritjen e objektivave të ARE-së sipas afateve të parapara për vitin 2017. Rezultatet e raportit treguan se vetëm 39.9% e objektivave të parapara për të tri shtyllat ishin përbushur, ndërkaj 14.1% e tyre nuk ishin përbushur.⁶

¹ Marrëveshja e Stabilizim Asociimit ndërmjet Kosovës në një rën anë, dhe Bashkimit Evropian dhe Komunitetit Evropian të Energjisë Atomike, në anën tjetër. Burimi: <https://bit.ly/2LFck9H>

² Agjenda për Reforma Evropiane (ARE) (2016) Kosovë – BE Dialogu i Nivelit të Lartë për Prioritetet Kyçe. Burimi: <https://bit.ly/2fF3mr0>

³ Programi Kombëtar për Reforma në Ekonomi (2016). Burimi: <https://bit.ly/2vcZrtl>

⁴ Plani i Veprimit për Zbatimin e Prioriteteve Kyçe të ARE-së (2016). Burimi: <https://bit.ly/2fF3mr0>

⁵ Vendimet e Mbledhjes së 13-të të Qeverisë së Republikës së Kosovës (2017). Burimi: <https://bit.ly/2M8ZX1C>

⁶ Instituti GAP, GLPS, PIPS: "Raporti i Monitorimit të ARE-së 2017". Burimi: <https://bit.ly/2031bMG>

Metodologjia

Objektivat e Agjendës për Reforma Evropiane (ARE) janë paraparë të përmbushen deri më 31 dhjetor 2017. Disa nga këto objektiva janë paraparë të përmbushen gjatë tremujorit të parë, të dytë, të tretë apo të katërt, varësisht nga numri i veprimeve dhe institucioneve të përfshira në një objektivë. Kjo, ngase këto objektiva parashihnin hartimin e koncept dokumenteve, miratimin e tyre, hartimin e projektligjeve dhe miratimin e tyre si dhe nënshkrimin e marrëveshjeve, inicimin e programeve apo digjitalizimin e një sërë procesesh.

Megjithatë, me vendimin e ri të Kryeministrit Haradinaj, në mbledhjen e 13-të të Qeverisë së Kosovës në nëntor 2017, u përcaktuan datat e reja për pjesën e mbetur të objektivave të ARE-së. Ne kemi monitoruar zbatimin e këtyre prioriteteve në mënyrë që të ofrojmë një vlerësim mbi progresin e institucioneve drejt arritjes adekuate të qëllimeve të përcaktuara.

Monitorimi i objektivave është bërë përmes intervistave, pyetësorëve me email, shfletimit të dokumenteve të ndryshme zyrtare, përfshirë raporte për punën e bërë, lajmeve të publikuara në media apo në uebfaqe. Në këto burime kemi marrë informata lidhur me zbatimin e masave në sektorët përkatës dhe kemi identifikuar sfidat, dështimet dhe arritjet kryesore.

Vlerësimin e arritjes së objektivave e kemi bërë përmes përmbushjes së veprimeve specifike në katër nivele: a) e plotësuar, b) pjesërisht e plotësuar, c) e pa plotësuar, dhe d) në realizim e sipër. Në rast se nuk kemi arritur të mbledhim të dhëna për ndonjë objektivë, e kemi cekur se ka mungesë informacioni.

Për më tepër, vlerësimi ka reflektuar jo vetëm përmbushjen e objektivave, por edhe afatin kohor se kur janë përmbushur ato objektiva. Nëse një objektivë ka progres në përmbushjen e vet, por nuk është finalizuar brenda afatit të përcaktuar konsiderohet si pjesërisht e plotësuar. Ndërkaq nëse e njëjta ndodh, por afati për përmbushjen e objektivës nuk ka skaduar, atëherë progresi i objektivës vlerësohet që të jetë në realizim e sipër. Në anën tjetër, nëse një proces ka stagnuar nga viti i kaluar dhe nuk ka pasur fare progres në gjashtëmujorin e parë të vitit 2018 dhe është paraparë të përmbushet brenda kësaj kohe, atëherë ajo objektivë është cilësuar si e paplotësuar.

Edhe pse disa nga këto objektiva në ARE-në origjinale ishin vetëm veprime brenda një mase të gjerë, në këtë rast ne i kemi trajtuar sikur masa të veçanta me veprime përkatëse. Si rrjedhojë, kemi monitoruar gjithsej 29 masa dhe 107 veprime.

Institucionet e monitoruara brenda shtyllës së parë, Qeverisja e Mirë dhe Sundimi i Ligjit janë: Kuvendi i Kosovës, Ministria e Drejtësisë, Zyra e Kryeministrit, Ministria e Administratës Publike, Këshilli Gjyqësor i Kosovës dhe Komisioni Qendror i Zgjedhjeve.

Institucionet e monitoruara brenda shtyllës së dytë, Konkurrueshmëria dhe Klima e Investimeve, janë: Ministria e Tregtisë dhe Industrisë, Zyra e Kryeministrit, Ministria e Zhvillimit Ekonomik, Ministria e Financave, Agjencia e Statistikave të Kosovës, Ministria e Infrastrukturës, Zyra e Rregullatorit për Energji dhe Operatori i Sistemit, Transmisionit dhe Tregut të energjisë elektrike të Kosovës - KOSTT.

Ndërsa, institucionet e monitoruara për shtyllën e tretë, Punësimi dhe Arsimi janë: Ministria e Punës dhe Mirëqenies Sociale dhe Ministria e Arsimit, Shkencës dhe Teknologjisë.

Gjendja aktuale

Institucionet e Kosovës megjithëse kanë bërë progres në arritjen e objektivave duke ndërmarrë veprime të caktuara, mos miratimi i ligjeve, i nënshkrimit të vendimeve, dhe mosmarrëveshjet me palë të tjera kanë bërë që objektivat të ngecin dhe të mos arrihen.

Mos realizimi i prioriteteve të agjendës ndikon drejtpërdrejt dhe negativisht në përfitimet e Kosovës që vijnë nga Marrëveshja e Stabilizim Asociimit siç janë: humbjet nga potenciali për të eksportuar më lirë në tregun evropian apo humbja e fondeve të ndryshme për projekte strukturore të përkrahura nga Bashkimi Evropian, ndër të tjera.

Disa nga sfidat më të mëdha për Kosovën mbeten funksionalizimi i institucioneve të sundimit të ligjit, pavarësia, efikasiteti dhe llogaridhënia e gjyqësorit, si dhe luftimi i krimit të organizuar dhe korrupsionit. Veç kësaj, në dekadën e fundit, Kosova ka përjetuar një rritje ekonomike relativisht konstante me normë mesatare prej 3.5%. Kosova, po ashtu, ende vuan nga nivelet e larta të papunësisë, veçanërisht të të rinjve⁷, ekonomia joformale, diskriminimi gjinor në vendin e punës, një ekonomi kryesisht të bazuar në shërbime dhe të varur nga remitancat si dhe deficit të lartë tregtar e investime të ulëta.

Për më tepër, Raportet e Komisionit Evropian për Kosovën kanë theksuar rëndësinë e sundimit të ligjit dhe luftën kundër korrupsionit si fusha në të cilat Kosova duhet përmirësuar.⁸ Prandaj, çdo ngecje në arritjen e objektivave në ARE, rrjedhimisht MSA, e zgjasin procesin e integritetit të Kosovës në BE, por njëkohësisht edhe e bëjnë të pamundur përmirësimin e situatës politike, sociale dhe ekonomike.

Për shtyllën e parë, atë të qeverisjes së mirë dhe sundimit të ligjit, janë identifikuar 11 masa apo objektiva të papërfunduara dhe 36 veprime të cilat do duhej të ndërmerren për ta përmirësuar gjendjen aktuale. Kjo shtyllë përqendrohet në reforma në sistemin e drejtësisë që ndikojnë në rritjen e transparencës dhe llogaridhënien e qeverisë, luftimin e korrupsionit dhe krimit të organizuar të përcjellura me miratimin e legjislacionit përkatës i cili është efikas dhe i drejtë.⁹

Edhe pse sundimi i ligjit mbetet sfida e madhe, institucionet e angazhuara për plotësimin e objektivave të kësaj shkalle duket të kenë punuar më shumë, pasi që ka shkallën më të lartë të arritjes. Më saktësisht, rreth 64% të objektivave janë arritur me sukses, 11.1% janë arritur pjesërisht, 8.3% nuk janë arritur, ndërsa 16.7% të objektivave janë në realizim e sipër.

Disa nga sukseset brenda kësaj shtylle janë miratimi i Ligjit për Konflikt Interesi dhe i Ligjit për Prokurorin e Shtetit. Ndërkaq disa nga ngecjet në plotësimin e objektivave janë: miratimi i legjislacionit që bën të detyrueshëm pezullimin apo largimin e zyrtarëve publik; miratimi i Ligjit për Gjyqtarë dhe Prokurorë, auditimi dhe publikimi i raporteve financiare

⁷ Papunësia e të rinjve në Kosovë mesatarisht është 52.7% dhe niveli i përgjithshëm i papunësisë është rreth 30.5%. Burimi: <https://bit.ly/2EfXSMQ>

⁸ Komisioni Evropian, Raporti për Kosovën 2018. Burimi: <https://bit.ly/2lhNbzf>

⁹ Agjenda për Reforma Evropiane (ARE) (2016) Kosovë – BE Dialogu i Nivelit të Lartë për Prioritetet Kyçe. Burimi: <https://bit.ly/2fF3mr0>

për vitin 2017, miratimi i pakos ligjore për reformën e administratës publike, si dhe pakoja ligjore për reformën zgjedhore.

Sfidë po aq thelbësore është rritja e konkurrueshmërisë dhe klimës së investimeve në Kosovë. Si rrjedhojë, Kosova ka nevojë të rritë prodhimtarinë si dhe të ofrojë produkte konkurruese në rajon, të krijojë kapacitete eksportuese, përmirësojë mjedisin afarist, e të luftojë ekonominë jo formale që të tërheq investime brenda një sistemi më të mirë ekonomik.¹⁰

Shtylla e dytë, e konkurrueshmërisë dhe klimës së investimeve përbëhet nga 12 masa të cilat përfshijnë 44 veprime konkrete. Rezultatet nga monitorimi tregojnë se 38.6% e objektivave janë përbushur plotësisht, 11.4% janë përbushur pjesërisht, 13.6% nuk janë përbushur e 36.6% janë në realizim e sipër dhe pritet të përfundohen deri në fund të vitit.

Disa prioritetet kyçe u arritën brenda shtyllës së dytë, siç janë miratimi i Ligjit për Kontabilitet, Raportim Financiar dhe Auditim, zbatimi i mëtejshëm i e-prokurimit në nivel qendror e lokal, përditësimi dhe përkthimi i regjistrit për leje e licenca në gjuhën shqipe, angleze dhe serbe, miratimi i Strategjisë së Energjisë 2017-2026, si dhe përmirësimi i statistikave të prodhuara nga Agjencia e Statistikave të Kosovës (ASK) dhe prodhimi i statistikave të reja për biznese, fuqi punëtore, e buxhete familjare.

Ndërkaq, disa nga objektivat e paarritura të kësaj shtylle përfshijnë ngecjen e ristrukturimit të Agjencisë për Investime dhe Përkrahjen e Ndërmarrjeve në Kosovë (KIESA), zgjedhjes së bordit e objektivat përcjellëse për shkak të mungesës së nënshkrimit nga ministri, mos miratimi i planit të veprimit për burimet e ripërtëritshme të energjisë dhe i Ligjit për Eficiencë të Energjisë si dhe krijimit të fondit gjegjës. Përveç kësaj, zbatimi i masave të buta në kuadër të agjendës së inter-konektivitetit ngelin pas për shkak të kostove të larta për operatorin e transmisionit dhe moszbatimit të marrëveshjeve nga të gjitha palët nënshkruese.

Mirëpo, Kosova ballafaqohet edhe me sfida të brendshme në lidhje me zhvillimin socio-ekonomik, ku vetëm rreth 20% e grave janë të punësuara në krahasim me një përqindje shumë më të

Shtylla I:

Vetëm dy nga 11 masa janë përbushur krejtësisht.

Ndërkaq nga 36 veprime, për total 11 masat:

- 23 janë plotësuar,
- 4 janë pjesërisht të plotësuar
- 3 të paplotësuar dhe
- 6 janë në realizim e sipër.

Shtylla II:

Vetëm dy nga 12 masa të përgjithshme janë përbushur krejtësisht.

Ndërkaq nga 44 veprime, për total 12 masa:

- 17 janë plotësuar,
- 5 janë pjesërisht të plotësuar
- 6 të paplotësuar dhe
- 16 janë në realizim e sipër.

Shtylla III:

Vetëm një nga gjashtë masa është përbushur krejtësisht.

Ndërkaq nga 27 veprime, për total 6 masa:

- 6 janë plotësuar,
- 10 janë pjesërisht të plotësuar
- 6 të paplotësuar dhe
- 5 janë në realizim e sipër.

¹⁰ Agjenda për Reforma Evropiane (ARE) (2016) Kosovë – BE Dialogu i Nivelit të Lartë për Prioritetet Kyçe. Burimi: <https://bit.ly/2fF3mr0>

madhe të burrave me rreth 65.3%. Për më tepër, vetëm afro 9% e fuqisë punëtore nën 19 vjeç janë pjesë e tregut të punës.¹¹ Kosova po ashtu ka shumë institucione të arsimit të lartë, sidomos, në sektorin privat, mirëpo cilësia e arsimit parauniversitar lë shumë për të dëshiruar.¹²

Gjatë këtij gjashtëmujori, brenda shtyllës së tretë, punësimi dhe arsimit, janë paraparë të realizohen gjashtë masa kryesore të cilat përcjellen me 27 veprime konkrete. Gjendja për realizimin e objektivave të kësaj shtylle është më e keqja ku vetëm 22.2% të objektivave janë arritur, rreth 37% janë arritur pjesërisht, 22.2% nuk janë arritur dhe 18.5% janë në realizim e sipër.

Përfundime

Agjenda për Reforma Evropiane (ARE) është proces i dialogut të lartë në mes të Kosovës dhe BE-së, i cili ka për detyrë të përshpejtojë zbatimin e prioritetëve kyçe të Marrëveshjes së Stabilizim Asociimit (MSA). Plani i Veprimit i kësaj agjende ka paraparë përfundimin e objektivave brenda vitit 2017, por siç ndodhi me shumë procese tjera, edhe këto prioritetete mbetën mbrapa për shkak që viti i kaluar ishte vit zgjedhor dhe fokusi i qeveritarëve ishte tek fushatat politike.

Kryeministri Haradinaj mori vendim në fund të vitit të kaluar (2017) se në cilat objektiva do të fokusohet Qeveria e Kosovës dhe ofroi afate të reja për t'i arritur ato. Por, as këto afate nuk u respektuan. Gjatë gjashtëmujorit të parë të vitit 2018, vërehet neglizhencë e institucioneve për të vënë hapat e fundit në disa procese e mos kokëçarje në fillimin e proceseve të tjera po aq të rëndësishme.

Rezultatet e monitorimit tregojnë se situata në gjashtëmujorin e parë të vitit 2018 nuk është shumë më e mirë se vitin e kaluar për sa i përket përbushjes së objektivave të ARE-së. Në fakt, nga 107 veprimet për të tri shtyllat, vetëm 46 veprime (43%) janë përbushur plotësisht, 19 veprime (17.7%) janë përbushur pjesërisht, 15 veprime (14%) janë të papërbushura, ndërkaq 27 veprime (25.2%) mbesin të realizohen në gjashtëmujorin e radhës. Në përgjithësi, institucionet e ngarkuara me objektivat e qeverisjes së mirë dhe sundimit të ligjit plotësuan më së shumti objektiva, pasuar nga ato të konkurrueshmërisë dhe klimës së investimeve dhe në fund nga institucionet e punësimit dhe arsimit.

Kosovës i nevojitet një përkushtim më i madh ndaj këtyre reformave të cilat do të ndihmonin luftën ndaj korrupsionit, konfliktit të interesit, përmirësimit të kushteve të punësimit dhe arsimit si dhe përfaqësimit të barabartë gjinor, zhvillimin e kompanive konkurruese prodhuese, uljen e deficitit tregtar e të kostos së eksportit. Përfshirja e shoqërisë civile, komunitetit të biznesit dhe opozitës në këto reforma është qenësore, meqë zbatimi i ERA-së kërkon mbështetjen dhe bashkëpunimin e të gjitha palëve dhe institucioneve.

¹¹ Agjencia e Statistika të Kosovës, Fuqia punëtore dhe shkalla e pjesëmarrjes në fuqinë punëtore sipas gjinisë dhe grupmoshës (2017). Burimi: <https://bit.ly/2vKoYtc>

¹² Agjenda për Reforma Evropiane (ARE) (2016) Kosovë – BE Dialogu i Nivelit të Lartë për Prioritetet Kyçe. Burimi: <https://bit.ly/2fF3mr0>

REZULTATET PËR JANAR-QERSHOR 2018

MASA	VEPRIMET	E PLOTËSUAR	%	PJESËRISHT E PLOTËSUAR	%	E PAPLOTËSUAR	%	NË REALIZIM E SIPËR	%
1	3	2	66.67	-	-	-	-	1	33.33
2	3	3	100	-	-	-	-	-	-
3	3	3	100	-	-	-	-	-	-
4	3	2	66.67	1	33.33	-	-	-	-
5	1	-	-	-	-	1	100	-	-
6	5	3	60	-	-	-	-	2	40
7	2	-	-	-	-	1	50	1	50
8	4	3	75	-	-	-	-	1	25
9	4	3	75	-	-	-	-	1	25
10	3	-	-	3	100	-	-	-	-
11	5	4	80	-	-	1	20	-	-
12	3	-	-	-	-	3	100%	-	-
13	1	-	-	-	-	-	-	1	100%
14	1	1	100%	-	-	-	-	-	-
15	2	-	-	1	50%	1	50%	-	-
16	5	1	20%	-	-	-	-	4	80%
17	3	1	33.33%	1	33.33%	1	33.33%	-	-
18	5	4	80%	-	-	-	-	1	20%
19	8	3	37.5%	-	-	-	-	5	62.5%
20	1	1	100%	-	-	-	-	-	-
21	5	4	80%	-	-	-	-	1	20%
22	5	1	20%	-	-	-	-	4	80%
23	5	1	20%	3	60%	1	20%	-	-
24	7	3	42.86%	2	28.57%	-	-	2	28.57%

25	2	2	100%						
26	3							3	100%
27	3	1	33.33%	1	33.33%	1	33.33%		
28	7			5	71.43%	2	28.57%		
29	5			2	40%	3	60%		
TOTALI	107	46 veprime	42.99%	19 veprime	17.76%	15 veprime	14.02%	27 veprime	25.23%

Tabela 1. Gjendja statistikore e Agjendës për Reforma Evropiane, për gjashtë mujorin e parë 2018.

ANEKS I: REZULTATET E MONITORIMIT TË AGJENDËS PËR REFORMA EVROPIANE

QEVERISJA E MIRË DHE SUNDIMI I LIGJIT

Në shtyllën e parë janë paraparë të realizohen 11 masa, me gjithsej 36 veprime. Prej 36 veprimeve të identifikuar, 23 veprime apo 63.89% e tyre janë plotësuar në tërësi, katër veprime apo 11.1% janë realizuar pjesërisht, tri veprime apo 8.3% e tyre mbesin të paplotësuara dhe gjashtë veprime apo 16.7% janë paraparë për periudha kohore më të mëvonshme.

Këto 11 masa janë të ndara në tri kategori:

- I. Sundimi i ligjit,
- II. Reforma zgjedhore dhe
- III. Reforma e Administratës Publike.

INFORMATATA PËR SECILËN MASË NË VEÇANTI

Masa 1: Kjo masë është realizuar 66.67%, ndërsa pjesa tjetër e saj është paraparë të realizohet në periudha të mëvonshme. Për miratimin e legjislacionit duke e bërë të detyrueshëm pezullimin dhe/ose largimin e zyrtarëve publik dhe plotësimin e kësaj mase, hapi tjetër është përfshirja e çështjes së suspendimit nga puna të zyrtarëve në Kod të Procedurës Penale.

Masa 2: Plotësimi dhe ndryshimi i Ligjit për Konflikt Interesi është miratuar dhe si e tillë kjo masë është realizuar në tërësi. Ligji për Konflikt Interesi është pjesë e Agjendës për Reforma Evropiane që nga TM4 2016 dhe pas shumë vonesave është miratuar në TM1 2018.

Masa 3: Plotësimi dhe ndryshimi i Ligjit për Prokurorin e Shtetit është miratuar dhe si e tillë kjo masë është realizuar në tërësi. Ligji për Prokurorin e Shtetit është pjesë e Agjendës për Reforma Evropiane që nga TM2 2017 dhe pas shumë vonesave edhe ky projektligji është miratuar në TM1 2018.

Masa 4: Miratimi i Ligjit për Përgjegjësinë Disiplinore për Gjyqtarë dhe Prokurorë nuk është arritur ende, procesi aktualisht gjendet tek pranimi i rekomandimeve nga komisionet pas konsultimeve. Andaj, kjo masë konsiderohet e realizuar 66.67%, ndërsa pjesa tjetër është realizuar pjesërisht.

Masa 5: Masë e re në këtë agjendë është Pakoja ligjore për reformën zgjedhore, për të cilën në gjashtë mujorin e parë të 2018 nuk është punuar asgjë, andaj, kjo masë mbetet e paplotësuar në tërësi.

Masa 6: Projektligji për Financimin e Subjekteve Politike është masë e paraparë për agjendën e viti 2018, edhe pse miratimi i këtij projektligji ishte përcaktuar për vitin 2017. Kjo masë është realizuar 60%, ndërsa 40% e saj është paraparë të realizohet në TM3.

Masa 7: Auditimi i raporteve financiare për vitin 2017 nuk është realizuar ende, edhe pse kjo procedurë është iniciuar nga Komisioni për Mbikëqyrje të Financave Publike në Janar të vitit 2018. Ky proces nuk ka përfunduar si rezultat i mungesës së ofertave nga operatorët ekonomik. Pasqyrat financiare të audituara të financave publike janë publikuar deri në vitin 2016. Ajo që duhet rikujtuar është që një nga arsyet e vonimit të auditimit të raporteve financiare ka qenë, edhe gjatë vitit të kaluar, mungesa e ofertave nga operatorët ekonomik. Kjo masë është 50% e paplotësuar dhe 50% e saj pritet të realizohet në periudha të mëvonshme, së bashku me pjesën e paplotësuar.

Masa 8: Kjo masë është realizuar 75%, ndërsa 25% e kësaj mase është paraparë të realizohet në periudha të mëvonshme. Mbetet vetëm miratimi i draft-planit të veprimit për racionalizimin e Agjencive nga Qeveria e Kosovës gjatë muajit korrik sepse ajo është periudha kohore e paraparë që të miratohet.

Masa 9: Kjo masë është realizuar 75%, ndërsa 25% e kësaj mase është paraparë të realizohet në periudha të mëvonshme. Konkretisht, arsyeja se pse kjo masë nuk është plotësuar vitin e kaluar në tërësi dhe është bartur në këtë vit është se Njësia për Politika dhe Monitorimin e Ndërmarrjeve Publike në MZHE nuk i ka publikuar ende CV-të e listës së ngushtë apo të personave të emëruar në bordet e NP për shkak të problemeve me pajisjet e tyre teknologjike.

Masa 10: Miratimi i pakos ligjore për reformën e Administratës Publike mbetet ende si objektive pjesërisht e plotësuar sepse nuk ka arritur ende të miratohet që nga viti i kaluar.

Masa 11: Kjo masë është realizuar 80%, ndërsa 20% e kësaj është realizuar pjesërisht. Ky 20% ka mbetur pjesërisht sepse gjyqtarët e rinj nuk do të jenë në dispozicion për trajtimin e rasteve gjyqësore deri në përfundimin e trajnimit fillestar në Akademinë e Drejtësisë dhe 2 gjyqtarët e paraparë të caktohen në Divizionin Fiskal mbetet të caktohen pasi të përfundoj ky trajnim.

Detajet e tjera mund të gjenden në matricë dhe tabelën statistikore.

QEVERISJA E MIRË DHE SUNDIMI I LIGJIT									
REZULTATET PËR MASAT E PARAPARA									
MASA	VEPRIMET	E PLOTËSUAR	%	PJESËRISHT E PLOTËSUAR	%	E PAPLOTËSUAR	%	NË REALIZIM E SIPËR	%
1	3	2	66.67	-	-	-	-	1	33.33
2	3	3	100	-	-	-	-	-	-
3	3	3	100	-	-	-	-	-	-
4	3	2	66.67	1	33.33	-	-	-	-
5	1	-	-	-	-	1	100	-	-
6	5	3	60	-	-	-	-	2	40
7	2	-	-	-	-	1	50	1	50
8	4	3	75	-	-	-	-	1	25
9	4	3	75	-	-	-	-	1	25
10	3	-	-	3	100	-	-	-	-
11	5	4	80	-	-	1	20	-	-
Totali	36 veprime	23 veprime	63.89%	4 veprime	11.11%	3 veprime	8.33%	6 veprime	16.67%

Tabela 2. Gjendja statistikore për shtyllën Qeverisja e mirë dhe Sundimi i ligjit.

MATRICA E AGJENDËS PËR REFORMA EVROPIANE 2018

QEVERISJA E MIRË DHE SUNDIMI I LIGJIT

I. SUNDIMI I LIGJIT

MASA	VEPRIMET	INSTIT. PËRGJEGJËS	PERIUDHA	GJENDJA
1	1.1) Miratimi i koncept dokumentit për të siguruar pezullimin dhe/ose largimin e detyrueshëm të zyrtarëve publik të akuzuar dhe dënuar për korrupsion	MD QEVERIA	TM4 2016/ TM3 2018	P
	1.2) Miratimi i Kodit Penal të Kosovës	MD QEVERIA		P
	1.3) Miratimi i legjislacionit për të siguruar pezullimin dhe/ose largimin e detyrueshëm të zyrtarëve publik të akuzuar dhe dënuar për korrupsion	MD QEVERIA		RS

Gjendja për periudhën TM1 – TM2 2018

1.1 / 1.2) Qeveria e Kosovës ka miratuar projekt Kodin e ri Penal të Kosovës me datë 13 Prill 2018.

Sipas ministrit të drejtësisë, për hartimin e Kodit të ri janë bazuar në tri parime themelore: përcaktimin e qartë për sundim të mirëfilltë të ligjit dhe luftës kundër korrupsionit dhe krimit të organizuar; fleksibilitet më i madh në punën e organeve të pavarura të zbatimit të ligjit; dhe mbrojtje, promovim dhe avancim të nocionit të drejtave të njeriut. Janë ndryshuar nenet që nga kontrabandimi, e deri te mashtrimi dhe prodhimi i produkteve të dëmshme, si dhe ri-përcaktimin e veprave penale të korrupsionit, keqpërdorimit të pozitës apo autoritetit zyrtar, marrjen e dhënien e ryshfetit, mashtrimin në detyrë, etj. Kodi i ri Penal, sipas ministrit Tahiri mund të hyjë në fuqi në janar të vitit 2019.

Ndryshimet e parapara me koncept dokumentin për suspendimin e zyrtarëve publik në rast të ngritjes së aktakuzave për korrupsion, janë përfshirë në këtë Kod.

“Rrjedhimisht, janë propozuar amendamentet e reja që i ndalojnë personit zyrtar ushtrimin e funksionit në administratën publike apo në shërbimin publik deri në 10 vjet nga aktgjykimi dënues. Kjo dispozitë parasheh që kur zyrtari publik të dënohet për vepër penale të korrupsionit, atij t’i ndalohej ushtrimi i funksioneve në shërbim publik deri në dhjetë vjet” ka thënë ministri Tahiri.

Me datë 15.11.2017 kryeministri ka marrë vendimin për aprovimin e Koncept Dokumentit për të siguruar pezullimin dhe/ose largimin e detyrueshëm të zyrtarëve publik të akuzuar dhe dënuar për korrupsion.

1.3) Koncept dokumenti ka paraparë ndryshimet e Kodit Penal dhe Kodit të Procedurës Penale. Sa i përket largimit nga puna (nga 1 deri në 10 vite) për personat të cilët shpallen fajtor për vepra penale të korrupsionit dhe keqpërdorimit të detyrës zyrtare, kjo çështje është përfshirë (neni 63) në Projekt-Kodin penal, kurse çështja e suspendimit nga puna të zyrtarëve, me rastin e ngritjes së aktakuzës për vepra penale të cekura më lartë, do të përfshihet në Kod të Procedurës Penale, proces në të cilin është duke u punuar aktualisht.

2	Plotësimi i Ligjit për Konflikt Interesi	2.1) Pranimi i Projektligjit nga Komisioni Legjislacjon, Mandate, Imunitete, Rregulloren e Kuvendit dhe Mbikëqyrjen e Agjencisë Kundër Korrupsionit	KUVENDI	TM1 2018	P
		2.2) Pranimi i Projektligjit nga Komisioni për Integritime Evropiane	KUVENDI		P
		2.3) Miratimi i Projektligjit nga Kuvendi	KUVENDI		P

Gjendja për periudhën TM1 – TM2 2018

2.1) Me datë 29 Mars 2018, në mbledhjen e mbajtur Komisioni për Legjislacjon, Mandate, Imunitete, Rregulloren e Kuvendit dhe Mbikëqyrjen e Agjencisë Kundër Korrupsionit, pas diskutimeve përkrahu Projektligjin nr. 06/L-011 për parandalimin e konfliktit të interesit në ushtrimin e funksionit publik. Në nenin 12, pas paragrafit 2, shtohet paragraf i ri 3 me përmbajtjen si vijim: "Zyrtari i lartë nuk mund të ushtrojë më shumë se një funksion në sektorin publik, përveç rasteve kur është i caktuar sipas detyrës zyrtare".

2.2) Me datë 30 Mars 2018, Komisioni për Integritime Evropiane, kryesuar nga kryetarja e Komisionit, Blerta Deliu-Kodra, shqyrtoi Projektligjin për parandalimin e konfliktit të interesit në ushtrimin e funksionit publik, me amendamentet e komisioneve funksionale, nga aspekti i përputhshmërisë me legjislacjonin e BE-së. U theksua fakti se këto projektligje nuk rregullohen në mënyrë specifike me legjislacjonin e BE-së dhe rekomandohen për miratim në seancë.

2.3) Me datë **30 Mars 2018** gjatë seancës plenare të Kuvendit të Kosovës, kryesuar nga kryeparlamentari, Kadri Veseli, (dhe një pjesë e seancës është kryesuar nga nënkryetari Xhavit Haliti), deputetët shqyrtuan dhe miratuan në lexim të dytë 11 projektligje, ku në mesin e tyre u miratua edhe Projektligji nr. 06/L-011 për parandalimin e konfliktit të interesit në ushtrimin e funksionit publik.

3	Plotësim - ndryshimi i Ligjit mbi Prokurorin e Shtetit për të mundësuar rritjen e numrit të prokurorëve në Prokurorinë Speciale, për hetimin dhe ndjekjen penale të rasteve të korrupsionit dhe krimin të nivelit të lartë.	3.1) Pranimi i Projektligjit nga Komisioni Legjislacjon, Mandate, Imunitete, Rregulloren e Kuvendit dhe Mbikëqyrjen e Agjencisë Kundër Korrupsionit	MD QEVERIA AKADEMIA E DREJTËSISË	TM2 2017 / TM1 2018	P
		3.2) Pranimi i Projektligjit nga Komisioni për Integritime Evropiane	MD QEVERIA AKADEMIA E DREJTËSISË		P
		3.3) Miratimi i Projektligjit nga Kuvendi	MD QEVERIA AKADEMIA E DREJTËSISË		P

Gjendja për periudhën TM1 – TM2 2018

Me datë 15 Nëntor 2017, Qeveria e Kosovës ka miratuar projektligjin për ndryshimin dhe plotësimin e ligjit për prokurorin e shtetit.

3.1) Me datë 29 Mars 2018, në mbledhjen e mbajtur Komisioni për Legjislacjon, Mandate, Imunitete, Rregulloren e Kuvendit dhe Mbikëqyrjen e Agjencisë Kundër Korrupsionit, pas diskutimeve përkrahu Projektligjin nr. 06/L-025 për ndryshimin dhe plotësimin e Ligjit nr. 03/L-225 për Prokurorin e Shtetit, i ndryshuar dhe plotësuar me

Ligjin nr. 05/L-034. Komisioni nuk përkrahu amendamentin e deputetes Albulena Haxhiu, për të shtuar një nen të ri në këtë projektligj "për kryerjen e përgjegjësisë të tyre, çdo prokuror duhet të ketë nga një bashkëpunëtor profesional". Ndonëse të gjithë anëtarët e komisionit në parim shprehën miratim për këtë propozim, ata shtuan se duhet bërë një analizë buxhetore më e hollësishme.

3.2) Me datë 30 Mars 2018, Komisioni për Integritet Evropian, kryesuar nga kryetarja e Komisionit, Blerta Deliu-Kodra, shqyrtoi Projektligjin për ndryshimin dhe plotësimin e Ligjit për Prokurorin e Shtetit, me amendamentet e komisioneve funksionale, nga aspekti i përputhshmërisë me legjislacionin e BE-së. U theksua fakti se këto dy projektligje nuk rregullohen në mënyrë specifike me legjislacionin e BE-së dhe rekomandohen për miratim në seancë.

3.3) Me datë **30 Mars 2018** gjatë seancës plenare të Kuvendit të Kosovës, kryesuar nga kryeparlamentari, Kadri Veseli, (dhe një pjesë e seancës është kryesuar nga nënkryetari Xhavit Haliti), deputetët shqyrtuan dhe miratuan në lexim të dytë 11 projektligje, ku në mesin e tyre u miratua edhe Projektligji nr. 06/L-025 për ndryshimin dhe plotësimin e Ligjit nr. 03/L-225 për Prokurorin e Shtetit.

4	Ligji për Përgjegjësinë Disiplinore për Gjyqtarë dhe Prokurorë	4.1) Hartimi i Projektligjit për Përgjegjësinë Disiplinore për Gjyqtarë dhe Prokurorë	MD QEVERIA	TM1 2018	P
		4.2) Miratimi i Projektligjit për Përgjegjësinë Disiplinore për Gjyqtarë dhe Prokurorë nga Qeveria	MD QEVERIA		P
		4.3) Miratimi i Projektligjit për Përgjegjësinë Disiplinore për Gjyqtarë dhe Prokurorë nga Kuvendi.	MD QEVERIA		PJ

Gjendja për periudhën TM1 – TM2 2018

4.1/ 4.2) Projektligji për përgjegjësinë disiplinore të gjyqtarëve dhe prokurorëve është miratuar në Qeveri me 01.02.2018.

4.3) Projektligji me datë 03 Maj 2018 është miratuar në parim dhe Kuvendi angazhoi për shqyrtim këto komisione: Komisioni Legjislacion, Mandate, Imunitete, Rregulloren e Kuvendit dhe Mbikëqyrjen e Agjencisë Kundër Korrupsionit; Komisionin për Buxhet dhe Financa; Komisionin për Integritet Evropian; dhe Komisionin për të Drejtat, Interesat e Komuniteteve dhe për Kthim;

Komisionet në fjalë pritet të dërgojnë rekomandimet e tyre brenda afatit kohor të paraparë në Rregulloren e Kuvendit.

II. REFORMA ZGJEDHORE

MASA	VEPRIMET	INSTIT. PËRGJEGJËS	PERIUDHA	GJENDJA
5	Përgatitja e pakos ligjore për reformën zgjedhore, duke përfshirë rekomandimet e misionit vëzhgues të BE-së dhe kërkesa për opinion nga komisioni i Venedikut.	KUVENDI	TM3 2018	PA

Gjendja për periudhën TM1 – TM2 2018

Nuk ka asnjë zhvillim konkret për sa i përket Reformës Zgjedhore.

6	Përgatitja e Ligjit për financimin e partive politike dhe kërkesa për opinion nga komisioni i Venedikut.	6.1) Hartimi i draftit të Projektligjit për financimin e partive politike	ZKM	TM3 2018	P
		6.2) Konsultimet publike, të kryera.	ZKM		P
		6.3) Shqyrtimi i Projektligjit nga Komisioni i Venedikut.	ZKM		P
		6.4) Miratimi i Projektligjit nga Qeveria.	ZKM		RS
		6.5) Miratimi i Projektligjit nga Kuvendi.	ZKM		RS

Gjendja për periudhën TM1 – TM2 2018

6.1) Zyra Ligjore e ZKM-së, ka hartuar draftin e Projektligjit për Financimin e Subjekteve Politike dhe ka organizuar takime publike me përfaqësues të subjekteve politike dhe OJQ. Projektligji ka kaluar fazën e konsultimit paraprak sipas nenit 7 të Rregullores 09/ 2011 të Punës së Qeverisë.

6.2) Projektligji ka kaluar fazën e konsultimit paraprak sipas nenit 7 të Rregullores 09/ 2011 të Punës së Qeverisë të Republikës së Kosovës dhe Rregullores (QRK) Nr.05 / 2016 për Standardet Minimale për Procesin e Konsultimit Publik.

6.3) Projektligjit për Financimin e Subjekteve Politike me datë 16 prill 2018 është dërguar në Komisionin e Venedikut për shqyrtim. Me datë 22- 23 qershor 2018 përfaqësues nga Zyra e Kryeministrit të Kosovës kanë marrë pjesë në sesionin plenar të 115-të, të Komisionit të Venedikut, ku kanë prezantuar Projektligjit për Financimin e Subjekteve Politike.

6.4/6.5) Projektligji për Financimin e Subjekteve Politike është paraparë të miratohet nga Qeveria e Republikës së Kosovës më 28.09.2018.

7	Përfundimi i auditimit të financave të partive politike; Publikimi i raporteve financiare të partive politike, siç parashihet me ligj.	7.1) Përfundimi i auditimit të financave të partive politike për vitin 2017.	KUVENDI	TM2 2018	PA
		7.2) Publikimi i raporteve financiare të partive politike, siç parashihet me ligj.	KQZ	TM3 2018	RS

Gjendja për periudhën TM1 – TM2 2018

7.1) Komisioni për Mbikëqyrje të Financave Publike me datë 19 janar 2018 ka aprovuar kërkesën që 10 auditorë të merren me auditimin e raporteve financiare për vitin 2017. Mirëpo, si rezultat i mungesës së operatoreve ekonomik procesi qëndron ende në fazën e përzgjedhjes. Komisioni ka dërguar në ri-tenderim për herën e tretë auditimin e raporteve financiare, pasi që procesi i përzgjedhjes ka dështuar 2 herë radhazi. Kërkesa është publike mirëpo edhe pas takimeve konsultative me operatorët ekonomik nuk ka pasur kërkesa të dërguara nga operatorët ekonomik.

Afati i fundit për dërgimin e ofertave nga operatorët ekonomik është data 15 gusht 2018, mirëpo komisionit për Mbikëqyrje të Financave Publike do t'i duhet ta zgjasë këtë afat nëse nuk pranon oferta nga operatorët ekonomik.

7.2) Publikimi i raporteve financiare të partive politike, siç parashihet në ligj, nuk mund të bëhet nëse ato nuk janë të audituara. Mirëpo, përderisa afati për publikim mbetet TM3 2018 ky veprim nuk mund të konsiderohet e paplotësuar por ne realizim e sipër sepse ka ende kohë që kjo objektive të realizohet.

REFORMA E ADMINISTRATËS PUBLIKE

MASA	VEPRIMET	INSTIT. PËRGJEGJËS	PERIUDHA	GJENDJA	
8	Zbatimi i Planit për racionalizimin e agjencive te pavarura dhe organeve qendrore ne kuadër të Qeverise	8.1) Realizimi i analizës e cila ka për qëllim për racionalizimin e agjencive te pavarura dhe organeve qendrore ne kuadër të Qeverise	ZKM	TM3 2018	P
		8.2) Krijimi i grupit punues i cili duhet të hartoj Plani e Veprimit për racionalizimin e agjencive te pavarura dhe organeve qendrore ne kuadër të Qeverise	MAP		P
		8.3) Hartimi i planit për racionalizimin e agjencive te pavarura dhe organeve qendrore ne kuadër të Qeverise	MAP		P
		8.4) Miratimi i planit për racionalizimin e agjencive te pavarura dhe organeve qendrore ne kuadër të Qeverise	MAP		RS

Gjendja për periudhën TM1 – TM2 2018

8.1) Zyra e Kryeministrit ka përfunduar analizën e cila ka për qëllim racionalizimin e agjencive.

8.2) MAP ka krijuar grupin punues në lidhje me këtë pikë, i cili ka hartuar një PV me 4 runde të reformave. Raundi i parë janë agjencitë që janë në Kuvend, raundi i dytë dhe e tretë kanë të bëjnë me agjencitë që kanë kompetenca ekzekutive dhe janë në Qeveri, ndërsa i katërti ka të bëjë me agjencitë që janë ekzekutive po që janë në Kuvend, por që sipas standardeve evropiane duhet të jenë në Qeveri.

8.3) Pritet miratimi i draft-planit e veprimit për racionalizimin e Agjencive nga Qeveria e Kosovës gjatë muajit korrik.

9	Sigurimi i një procesi te përzgjedhjes që është transparent, i bazuar në merita dhe jo-politik, në harmoni me ligjin, për të gjitha institucionet e pavarura, agjencitë dhe organet rregullative, si dhe në kompani publike; Zbatimi i plotë i rekomandimeve nga Agjencia e Kosovës Kundër Korrupsionit (AKK-DLK-3113/15)	9.1) Përcjellja e i CV-ve të kandidatëve në listë të ngushtë;	ZKM	TM3 2018	P
		9.2) Publikimi i CV-ve të kandidatëve në listë të ngushtë NGA Njësia për Politika dhe Monitorimin e NP-së	ZKM		RS
		9.3) Përfshirja e shoqërisë civile në komisionet përzgjedhëse, në bazë të një përzgjedhje transparente dhe të hapur të përfaqësuesve të shoqërisë civile;	ZKM		P
		9.4) Fuqizimi dhe qartësimi i kriterëve minimale për kandidatët përmes përfshirjes së kriterëve të ngjashme me nenin 17 paragrafi 2 i ligjit mbi NP-të, për shembull, në ndryshimet në ligjin mbi konfliktin e interesit, duke i bërë kështu të aplikueshme në të gjitha agjencitë e pavarura dhe organet rregullative.	ZKM		P

Gjendja për periudhën TM1 – TM2 2018

9.1) Sekretariati Koordinues i Qeverisë të gjitha CV-it e kandidatëve të emëruar në borde të ndërmarrjeve publike” Trepça Sh.A, Telekom i Kosovës, i ka përcjell te Njësia për Politika dhe Monitorimin e NP-së /MZHE për t’u publikuar.

9.2) Njësia për Politika dhe Monitorimin e NP-së në MZHE nuk i ka publikuar ende CV, e listës së ngushtë apo të personave të emëruar, për të vetmen arsye, për shkak të problemeve teknike.

9.3) Me qëllim të rritjes së transparencës së punës së Qeverisë duke u bazuar në opinionin e Zyrës Ligjore të ZKM- me shkresën e Zyrës së Kryeministrit nr. 129/3 të datës 06 mars 2017 , Shoqëria Civile është e përfshirë në të gjitha komisionet rekomanduese për zgjedhjen e bordeve të ndërmarrjeve publike

9.4) Sekretari i Përgjithshëm i Zyrës së Kryeministrit me datën 24 shkurt 2017, ka nxjerr Rregullat mbi Identifikimin e Kandidatëve për drejtorë të Bordeve të Ndërmarrjeve Publike Qendrore dhe Metodologjinë e Vlerësimit, kjo objektivi konsiderohet i plotësuar.

10	Miratimi i pakos ligjore për reformë të Administratës Publike	10.1) Miratimin e Ligjit për Organizimin e Administratës Publike (ligj i ri);	MAP	TM2 2018	PJ
		10.2) Miratimi i Ligjit për Pagat nga Buxheti (ligj i ri);	MAP		PJ
		10.3) Miratimi i Ligjit për Shërbimin Civil (ligj i ri);	MAP		PJ

Gjendja për periudhën TM1 – TM2 2018

10.1) Hartimi i draft-ligjit për Organizimin dhe Funksonimin e Administratës Publike dhe agjencive të pavarura është në fazën e shqyrtimit dhe analizës së komenteve të pranuar nga institucionet e ndryshme gjatë fazës së konsultimeve publike dhe pastaj do të dërgohen për vlerësim financiar në MF dhe për opinion dhe deklaratën e pajtueshmërisë në MIE.

10.2) Hartimi i draft-ligjit për Zyrtarët Publik është në fazën e shqyrtimit dhe analizës së komenteve të pranuar nga institucionet e ndryshme gjatë fazës së konsultimeve publike dhe pastaj do të dërgohet për vlerësim financiar në MF dhe për opinion dhe deklaratën e pajtueshmërisë në MIE.

10.3) Hartimi i draft-ligjit për Pagat është në fazën e shqyrtimit dhe analizës së komenteve të pranuar nga institucionet e ndryshme gjatë fazës së konsultimeve publike dhe pastaj të dërgohen për vlerësim financiar në MF dhe për opinion dhe deklaratën e pajtueshmërisë në MIE.

11	Fuqizimi i kapaciteteve të Departamentit Ekonomik dhe Divizionit Fiskal në Departamentin Administrativ të Gjykatës së Shkallës së Parë në Prishtinë, përfshirë në fushat e tatimit dhe	11.1) Të bëhet vlerësimi i nevojave nga KGJK për rritjen e numrit të gjyqtarëve në Gjykatat Themelore Ekonomike.	KGJK	TM1 2017	PL
		11.2) Të ngritët numri i gjyqtarëve në Gjykatat Themelore.	KGJK		PL
		11.3) Ngritja e kapaciteteve njerëzore të nevojshme.	KGJK		PL

doganave, me qëllim të reduktimit të rasteve të grumbulluara	11.4) Caktimi i gjyqtarëve në Divizionin Fiskal	KGJK	PA
	11.5) Caktimi i gjyqtarëve në Departamentin Ekonomik	KGJK	PL

Gjendja për periudhën TM1 – TM2 2018

11.1) Në lidhje me Divizionin Fiskal në Gjykatën Themelore, KGJK ka kërkuar nga Programi i USAID-it i cili mbështet fuqizimin e sektorit të drejtësisë , që të kryejë një vlerësim në lidhje me zvogëlimin e numrit të lëndëve të pazgjidhura (backlog). Hulumtimi ka përfunduar dhe sipas rekomandimeve në Departamentin Administrativ- Divizioni Fiskal duhet te caktohen edhe dy (2) gjyqtar shtesë.

11.2) Në korrik të vitit 2017 presidenti i Republikës së Kosovës ka dekretuar 52 gjyqtarë të rinj. Shtatëmbëdhjetë gjyqtar të rinj janë caktuar nga KGJK-ja në Gjykatën Themelore të Prishtinës.

11.3) Administrata e gjykatës ka rekrutuar katër (4) staf profesional për të mbështetur divizionin fiskal në mbështetje të tyre janë edhe zyrtaret ligjorë.

11.4) Gjyqtarët e rinj nuk do të jenë në dispozicion për trajtimin e rasteve gjyqësore deri në përfundimin e trajnimit fillestar në Akademinë e Drejtësisë. Vlerësohet se gjyqtarët do të jenë në dispozicion në gusht apo shtator të këtij viti. Pas përfundimit të trajnimit KGJK në bashkëpunim me Kryetaren e Gjykatës Themelore të Prishtinës, janë zotuar të caktojnë gjyqtarë shtesë në Divizionin Fiskal.

11.5) Sa i përket Departamentit Ekonomik është caktuar edhe një gjyqtar shtesë dhe vlerësohet se numri i gjyqtarëve në këtë departament është i mjaftueshëm.

Tabela 3. Masat dhe veprimet për shtyllën Qeverisja e Mirë dhe Sundimi i Ligjit.

KONKURRUESHMËRIA DHE KLIMA E INVESTIMEVE

Në shtyllën e parë janë paraparë të realizohen 12 masa, me gjithsej 44 veprime. Prej 44 veprimeve të identifikuar, 17 veprime apo 38.6% e tyre janë plotësuar në tërësi, pesë veprime apo 11.4% janë realizuar pjesërisht, gjashtë veprime apo 13.6% e tyre mbesin të paplotësuara dhe 16 veprime apo 36.3% janë paraparë për periudha kohore më të mëvonshme.

Këto 12 masa janë të ndara në pesë kategori:

- I. Promovimi i Investimeve të huaja direkte
- II. Përmirësimi i mjedisit afarist
- III. Statistikat
- IV. Agjenda e Interkonektivitetit
- V. Energjia

INFORMATA PËR SECILËN MASË NË VEÇANTI

Masa 1: Kjo masë është konsideruar si 100% e paplotësuar pasi që për pothuajse një vit është shtyrë nënshkrimi i vendimit nga Ministri i Tregtisë, Bajram Hasani për ristrukturimin e KIESA-s. Kjo objektivë është përcjellur nga viti i kaluar për t'u përfunduar më së largu në mars 2018, por ende nuk ka përfunduar.

Masa 2: Kjo masë është konsideruar si 100% në realizim e sipër pasi që programi do të miratohet pas ristrukturimit të KIESA-së dhe me datën e re ka kohë të miratohet deri në fund të shtatorit në 2018.

Masa 3: Kjo masë është 100% e plotësuar meqenëse ligji është miratuar brenda afatit të ri, pra në tremujorin e parë 2018.

Masa 4: Kjo masë është 50% pjesërisht e paplotësuar dhe 50% e paplotësuar. Veprimi i parë është konsideruar si pjesërisht i plotësuar meqenëse edhe pse regjistri është i përditësuar dhe i përkthyer në të tri gjuhët, formularët ende nuk janë online në asnjërën gjuhë. Veprimi i dytë është konsideruar si i paplotësuar meqenëse ngjarjet promovuese nuk janë organizuar në tremujorin e dytë ashtu siç e ka paraparë vendimi i Kryeministrit.

Masa 5: Kjo masë është 20% e plotësuar, ndërsa 80% mbetet në realizim e sipër. Veprimi i parë është i plotësuar meqenëse koncepti dokumenti është miratuar në tremujorin e parë. Veprimet tjera janë konsideruar në realizim e sipër meqenëse MTI, Qeveria dhe Kuvendi kanë kohë t'i përfundojnë këto obligime deri në fund të shtatorit 2018.

Masa 6: Kjo masë është 33.33% pjesërisht e plotësuar, 33.33% e plotësuar, dhe 33.33% e paplotësuar. Veprimi i parë është konsideruar si pjesërisht i plotësuar pasi që rregulloret nuk janë miratuar megjithëse janë draftuar si dhe mbeten disa rregullore të padraftuara anipse është dashur të përfundojnë më së largu deri në fund të qershorit 2018. Veprimi i dytë është i plotësuar meqenëse DNSH është funksionalizuar brenda afatit të ri. Ndërkaq, veprimi i tretë është i paplotësuar, meqenëse Kuvendi nuk ka përzgjedhur KNSH dhe as nuk është bërë funksionalizimi i këtij komisioni brenda afatit të paraparë.

Masa 7: Kjo masë është 80% e plotësuar dhe 20% në realizim e sipër. Veprimi i katërt është konsideruar si në realizim e sipër pasi që qasja ndër-institucionale do të vazhdojë të fuqizohet megjithëse ka progres në këtë drejtim si dhe pritet të finalizohet në tremujorin e radhës, ndërsa veprimet tjera janë të plotësuara ngaqë kanë përfunduar brenda afateve të parapara.

Masa 8: Kjo masë është 37.5% e plotësuar dhe 62.5% në realizim e sipër. Veprimi i parë, i gjashtë dhe i shtatë janë konsideruar si të plotësuara pasi që janë realizuar në plotësi brenda afatit të paraparë. Ndërkaq, veprimi i dytë, tretë, katërt, pestë, dhe i tetë janë vlerësuar të jenë në realizim e sipër pasi që për secilin veprim ka progres, por pritet të përfundojnë në tremujorin e radhës.

Masa 9: Kjo masë është 100% e plotësuar meqenëse zbatimi i prokurimit elektronik ka përfunduar vitin e kaluar, por vazhdon të zbatohet edhe në 2018.

Masa 10: Kjo masë pothuajse është 80% e plotësuar dhe 20% në realizim e sipër. Katër veprimet e para janë të plotësuara me rregull brenda afateve, ndërsa veprimi i pestë është në realizim e sipër ngaqë pritet të përfundojnë në tremujorin e radhës.

Masa 11: Kjo masë është 20% e plotësuar e 80% në realizim e sipër. Veprimi i parë për legjislacionin primar është i plotësuar, por shumica e veprimeve mbesin në realizim e sipër për shkak të mos zbatimit të marrëveshjes nga palët tjera.

Masa 12: Kjo masë është 20% e plotësuar e 20% e paplotësuar, ndërsa 60% pjesërisht e plotësuar. Veprimi i parë është i plotësuar pasi që ka përfunduar brenda afatit të paraparë. Tre veprime janë vlerësuar si pjesërisht të plotësuara, ngaqë nuk janë finalizuar brenda afatit të paraparë, por ka progres në realizim e tyre. Ndërkaq, veprimi i fundit është i paplotësuar ngaqë nuk është krijuar brenda afatit të paraparë.

KONKURRUESHMËRIA DHE KLIMA E INVESTIMEVE									
REZULTATET PËR MASAT E PARAPARA									
MASAT	VEPRIMET	E PLOTËSUAR	%	PJESËRISHT E PLOTËSUAR	%	E PAPLOTËSUAR	%	NË REALIZIM E SIPËR	%
1	3	-	-	-	-	3	100%	-	-
2	1	-	-	-	-	-	-	1	100%
3	1	1	100%	-	-	-	-	-	-
4	2	-	-	1	50%	1	50%	-	-
5	5	1	20%	-	-	-	-	4	80%
6	3	1	33.33%	1	33.33%	1	33.33%	-	-
7	5	4	80%	-	-	-	-	1	20%
8	8	3	37.5%	-	-	-	-	5	62.5%
9	1	1	100%	-	-	-	-	-	-
10	5	4	80%	-	-	-	-	1	20%
1	5	1	20%	-	-	-	-	4	80%
12	5	1	20%	3	60%	1	20%	-	-
TOTALI	44 veprime	17 veprime	38.64%	5 veprime	11.36%	6 veprime	13.63%	16 veprime	36.36%

Tabela. 4. Gjendja statistikore për shtyllën Konkurrueshmëria dhe Klima e Investimeve .

KONKURRUESHMËRIA DHE KLIMA E INVESTIMEVE

I. PROMOVIMI I INVESTIMEVE TË HUAJA DIREKTE

MASA	VEPRIMET	INSTIT. PËRGJEGJËS	PERIUDHA	GJENDJA	
1	Ristrukturimi i Agjencisë për Investime dhe Përkrahjen e Ndërmarrjeve në Kosovë - KIESA	1.1) Ristrukturimi i KIESA për t'i mundësuar që të përmbush me efikasitet përgjegjësitë e saj dhe të zbatojë prioritetet, ndarjen e burimeve të duhura dhe rekrutimin e punonjësve të kualifikuar	MTI	TM1 2018	PA
		1.2) Zhvillimi i kapaciteteve të personelit të KIESA për dizajnimin dhe zbatimin e shërbimeve dhe programeve	MTI	TM1 2018	PA
		1.3) Themelimi i Bordit Këshillues në kuadër të KIESA me pjesëmarrjen e komunitetit biznesor dhe përfshirjen e fuqishme të Zyrës së Kryeministrit	MTI	TM1 2018	PA

Gjendja për periudhën TM1 – TM2 2018

1.1/1.2) Ristrukturimi i KIESA-s dhe masave përcjellëse fillimisht është paraparë të përfundojë në tremujorin e tretë të vitit 2017. Në vitin 2016, përmes një projekti të financuar nga BE, i quajtur "Rritja e konkurrueshmërisë dhe promovimi i eksportit" (ICEP) është bërë një analizë e detajuar për agjencinë e investimeve të Kosovës krahas agjencive në rajon në të cilin është rekomanduar struktura e re e KIESA-s. Në këtë analizë janë ofruar edhe rekomandime për përpilimin e shërbimeve dhe programeve të reja, por që të dyja kanë ngecur ngaqë Ministri i Tregtisë dhe Industrisë, Bajram Hasani nuk ka marrë vendim për ta finalizuar ristrukturimin e agjencisë.

Me vendimin e Kryeministrit Haradinaj për përfundimin e prioritetëve të Agjendës për Reforma Evropiane (ARE) në 2018, ristrukturimi është paraparë të përfundojë më 30 mars, por sipas raportit të fundit të Ministrisë së Integritimit Evropian (MIE), ristrukturimi mbetet i pa realizuar. Si rrjedhojë, mbetet që Ministria e Tregtisë dhe Industrisë (MTI) t'i propozojë Qeverisë strukturën organizative të KIESA-s, e cila është paraparë të bëhet bashkë me Rregulloren për organizimin e brendshëm të MTI-së ashtu si edhe është dakorduar në takimin e Këshillit Ministror për Integritim. Rregullorja e dërguar në Ministrinë e Administratës Publike (MAP) nga MTI nuk parasheh asgjë për KIESA, por vetëm për ndryshimet në Departamentin e Turizmit.

1.3) Sa i përket bordit këshillues, gjendja mbetet e njëjtë me vitin e kaluar, pra draft lista e anëtarëve të Ekipit të Kosovës (Team Kosova) dhe Bordit Konsultativ të KIESA-s është përgatitur dhe dërguar për miratim tek Ministri Hasani. MTI mbetet të dërgojë në Qeveri për miratim projektvendimin për themelimin e Bordit Këshillëdhënës.

2	Miratimi i after-care programit dhe shërbimeve për investitorët	2.1) Përgatitja dhe fillimi i zbatimit të shërbimeve dhe programeve të kujdesit pasues për investitorët	MTI	TM3 2018	RS
---	-----------------------------------------------------------------	---------------------------------------------------------------------------------------------------------	-----	----------	----

Gjendja për periudhën TM1 – TM2 2018

2.1) Miratimi i after-care programit dhe shërbimeve për investitorët fillimisht është paraparë të përfundojë në tremujorin e katërt të vitit 2017. Sipas MTI-së, gjatë vitit të kaluar KIESA kishte programe ekzistuese për të ofruar shërbime pasuese (after-care) për investitorët në Kosovë përmes të cilave ka krijuar bashkëpunim të ngushtë edhe me investitorë të ri të mundshëm në Kosovë.

Megjithatë, sipas vendimit të lartcekur të Kryeministrit, miratimi i këtij programi sipas rekomandimeve nga analiza është paraparë të bëhet më 30 shtator 2018. Mirëpo pa finalizuar ristrukturimin e agjencisë, as ky program nuk mund të miratohet. Mbetet të shihet nëse do të miratohet sipas afatit të përcaktuar, pra në fund të trejmuorit pasues.

Vlerësim: Kjo masë është konsideruar si **në realizim e sipër** pasi që programi do të miratohet pas ristrukturimit të KIESA-së dhe me datën e re ka kohë të miratohet deri në fund të shtatorit në 2018.

II. PËRMIRËSIMI I MJEDISIT AFARIST

MASA	VEPRIMET	INSTIT. PËRGJEGJËS	PERIUDHA	GJENDJA
3	Miratimi i Ligjit për Raportim Financiar, Kontabilitet dhe Auditim	KUVENDI	TM1 2018	P

Gjendja për periudhën TM1 – TM2 2018

3.1) Me qëllim të harmonizimit të legjislacionit vendor me legjislacionin e Bashkimit Evropian dhe njëherit adresimin më adekuat dhe të avancuar të fushës së raportimit financiar dhe auditimit, ligji për Raportim Financiar, Kontabilitet dhe Auditim është përpiluar që të përkojë me direktivat e Bashkimit Evropian mbi auditim Nr. 2014/56 dhe direktivën mbi raportimin vjetor financiar 2013/34. Projektligji për Kontabilitet, Raportim Financiar dhe Auditim është finalizuar nga grupi punues, dhe në versionin përfundimtar të projektligjit ka kontribuar gjithashtu Zyra Ligjore nga Zyra e Kryeministrit dhe ekspertët e UNDP-së. Sipas MF-së, projektligji adreson rekomandimet e dhëna nga raporti ROSC i Bankës Botërore (2012) mbi vëzhgimin e standardeve dhe kodeve të kontabilitetit dhe auditimit.

Projektligji është shpërndarë tek palët e interesit për komente dhe gjatë muajit nëntor 2017 janë përfunduar konsultimet publike duke përfshirë vërejtjet dhe sugjerimet e marra nga procesi i konsultimeve. Ky projektligj është miratuar nga Qeveria më 15 dhjetor 2017. Projektligji rregullon sistemin e kontabilitetit dhe raportimit financiar të shoqërive tregtare. Gjithashtu rregullon kompetencat dhe përgjegjësit e Këshillit të Kosovës për Raportim Financiar, kërkesat për auditim, kualifikimet për kontabilist profesional, licencimin e auditorëve dhe të firmave vendore dhe të huaja të auditimit si dhe organizatat profesionale të kontabilitetit.

Ligji është parashikuar të miratohet nga Kuvendi në tremujorin e parë 2017 mirëpo është shtyrë për tremujorin e tretë 2017. Miratimi i Ligjit nga Kuvendi është bërë më 30 mars 2018. Megjithatë publikimi i ligjit në gazetën zyrtare të Republikës së Kosovës është bërë më 19 prill 2018, pra pas afatit të paraparë me vendimin e Kryeministrit për përmbushjen e objektivave të ARE në 2018. MF ka sugjeruar që ligji të hyjë në fuqi 15 ditë pas publikimit siç praktikohet në të shumtën e rasteve, por Kuvendi e ka parë si të arsyeshme që ligji të hyjë në fuqi në janar 2019.

4	Përditësimi i regjistrit qendror për leje dhe licenca	4.1) Formularët për leje/licenca janë dërguar për përkthim në shqip dhe anglisht ZKM	ZKM	TM2 2018	PJ
		4.2) Ngjarje promovuese për versionin e përditësuar të këtij regjistri janë organizuar	ZKM		PA

Gjendja për periudhën TM1 – TM2 2018

4.1) Ligji për Sistemin e Lejeve dhe Licencave nxjerr si detyrim themelimin, administrimin dhe funksionimin e Regjistrit të lejeve dhe licencave në nivelin qendror të Republikës së Kosovës. Zyra Ligjore në Zyrën e Kryeministrit me përkrahjen e projektit nga IFC- Banka Botërore, dhe pas bashkëpunimit me të gjitha ministritë dhe institucionet e pavarura, gjatë vitit 2014 – 2015 ka identifikuar rreth 480 leje, licenca, autorizime, certifikime, pëlqime, etj.

Në nëntor të vitit 2017 ka filluar përditësimi i këtij regjistri. Regjistri Qendror i Lejeve dhe Licencave pas përditësimit përmban informacione për rreth 488 leje/licenca, të lëshuara nga 25 institucione qendrore në 21 fusha të aktivitetit ekonomik, ku përfshihen: leje, licenca, certifikata, autorizime etj.

Disa nga aktivitetet e ndërmarra janë:

- Rishikimi i listës së lejeve dhe licencave të identifikuar në nivel qendror
- Regjistri pas procesit të bashkëpunimit me akterë relevant përmes pyetësorit dhe duke përdorur formatin e rregullores për funksionimin e tij, tani përfshin edhe lejet dhe licencat që nuk kanë qenë pjesë e regjistrit të deritanishëm
- Ndryshimet e ndërmarra përfshijnë eliminim të lejeve/licencave ekzistuese, shtimit të lejeve/ licencave të reja, ndryshimet në tarifën/pagesën e aplikuar dhe kohën që nevojitet për marrjen e lejes/licencës, ndryshimet në dokumentacion që kërkohet për dorëzim tek autoriteti që lëshon lejen etj;
- Finalizimi i listës së azhurnuar të lejeve dhe licencave për çdo ministri/agjenci/ organizatë të pavarur
- Bërja e ndryshimeve direkt në regjistrin elektronik për lejet dhe licencat ekzistuese që kanë pasur ndryshime
- Vendosja e lejeve dhe licencave të reja në regjistër elektronik sipas pyetësorit për mbledhjen e informacionit mbi lejet & licencat

Regjistri online, <https://lejelicenca.rks-gov.net>, është i përkthyer në të tri gjuhët, shqip, serbisht dhe anglisht si dhe ka informacione për të gjitha lejet, licencat dhe tarifatat, mirëpo formularët në asnjërën gjuhë nuk janë të vendosura në të.

4.2) Ngjarjet për të promovuar versionin e azhurnuar të regjistrit elektronik për leje licenca varen nga agjenda e Kryeministrit dhe përfaqësuesve të Bankës Botërore, por pritet të mbahen në tremujorin e radhës.

5	Miratimi i Ligjit për Inspektime	5.1) Miratimi i Koncept dokumentit nga Qeveria	QEVERIA	TM3 2018	P
		5.2) Ligji për inspektimet e përgjithshme i hartuar	MTI		RS
		5.3) Konsultimet publike me shoqërinë civile dhe akterët tjerë relevant janë mbajtur	MTI		RS
		5.4) Miratimi i Projektligjit nga Qeveria	QEVERIA		RS
		5.5) Miratimi i Projektligjit nga Kuvendi	KUVENDI		RS

Gjendja për periudhën TM1 – TM2 2018

5.1/5.2) Koncept dokumenti për projektligjin për Inspektimet është paraparë të përgatitet në tremujorin e tretë të 2017-ës, ndërsa procedurat përcjellëse deri tek miratimi i ligjit të finalizohen gjatë tremujorit të katërt të po këtij viti. Gjatë gjysëmvetorit të parë të 2018-ës nuk ka pas ndonjë zhvillim rreth këtij ligji. Grupi punues për koncept dokumentin është caktuar me vendimin e 22 marsit të 2017-ës të qeverisë për hartimin e koncept dokumentin. Koncept dokumenti është hartuar nga grupi ndërmintor dhe është miratuar nga qeveria më 9 mars 2018.

5.3/5.4/5.5) Koncept dokumenti nuk ka dalë në konsultim publik dhe si rrjedhojë janë shtyer edhe miratimi i projektligjit nga qeveria dhe kuvendi. Megjithatë, vendimi i ri i Kryeministrit parasheh që ky ligj të miratohet deri në fund të tremujorit të tretë të 2018-ës dhe jo në gjashtëmujorin e parë.

6	Miratimi i legjislacionit sekondar për ndihmë shtetërore dhe funksionalizimi i Komisionit dhe Departamentit për Ndhmë Shtetërore	6.1) Miratimi i legjislacionit sekondar për ndihmë shtetërore	MF	TM2 2018	PJ
		6.2) Funksionalizimi i Departamentit për Ndhmë Shtetërore	MF		P
		6.3) Funksionalizimi i Komisionit për Ndhmë Shtetërore	KUVENDI		PA

Gjendja për periudhën TM1 – TM2 2018

6.1) Ligji për Ndhmën Shtetërore është miratuar më 23 dhjetor 2016 dhe është publikuar në Gazetën Zyrtare më 17 janar 2017. Deri më tani më janë draftuar dy rregullore: draft-rregullorja për procedurat e njoftimit të Ndhmës Shtetërore dhe draft-rregullorja për punën e Komisionit të Ndhmës Shtetërore.

Edhe pse e paraparë të përfundojnë në tremujorin e dytë të 2018-ës, hartimi i legjislacionit dytësor dhe rishikimi i dy rregulloreve të draftuara për funksionimin e DNSH pritet të përfundojnë në muajt në vijim. Draft-rregullorja për Procedurat dhe Formatin e Njoftimit për Ndhmë Shtetërore e finalizuar nga Grupi Punues dhe tashmë gjindet në Departamentin Ligjor për konsultimet finale para se të del në konsultime publike.

6.2) Gjatë vitit 2017, ka përfunduar procesi i bartjes së stafit, aseteve dhe të buxhetit nga Autoriteti Kosovar i Konkurrencës (AKK) në Ministrinë e Financave si dhe është emëruar Drejtori i Departamentit të Ndhmës Shtetërore. Departamenti për Ndhmë Shtetërore është kompletuar me staf në maj 2018, dhe vazhdon me përgatitjen e akteve nënligjore që rregullojnë fushën e ndihmës shtetërore në harmoni me direktivat e Bashkimit Evropian. Ndërkohë, është ndryshuar dhe plotësuar Rregullorja për Organizim të Brendshëm në MF-së më 15 nëntor 2017, ku është përmbyllur themelimi i këtij Departamenti. Funksionet e Departamentit të ndihmës shtetërore janë të rregulluara me nenin 8 të Ligjit nr.05/L-100 për Ndhmën Shtetërore.

6.3) Komisioni për Ndhmë Shtetërore duhet të emërohet nga Kuvendi dhe ligji parasheh që të përbëhet nga pesë anëtarë të cilët nuk janë aktivë në politikë me një mandat tre vjeçar. Konkursi për përzgjedhjen e kandidatëve është shpallur në korrik 2018, pra pas tremujorit të dytë të 2018-ës. Pas përfundimit të infrastrukturës ligjore dhe emërimit të Komisionit për Ndhmë Shtetërore, DNSH-ja do të krijoj inventarizimin dhe skemën për ndihmën shtetërore.

7	Zbatimi i planit të veprimit për të luftuar ekonominë joformale	7.1) Realizohen vlerësime të pavarura sektoriale të rrezikut	MF	TM3 2018	P
		7.2) Rishikohet/Miratohet Plani i Veprimit duke marrë parasysh të gjeturat nga vlerësimi i rrezikut	MF		P
		7.3) Përmirësohet më tej pajtueshmëria tatimore dhe zbatimi në mënyrë që të mbrohet interesi i fiskal i vendit	MF		P

7.4) Fuqizohet qasja ndër-institucionale dhe mekanizmat në fushën kundër pastrimit të parave, krimit financiar, financimit të terrorizmit dhe korrupsionit, përfshirë parandalimin, hetimet, vlerësimet dhe operimet

MF

RS

7.5) Raporte të rregullta tremujore, të përgatitura, konsultuara dhe publikuara

MF

P

Gjendja për periudhën TM1 – TM2 2018

7.1) Vlerësimet e pavarura sektoriale ndaj ekonomisë joformale, krimeve financiare, pastrimit të parave, financimit të terrorizmit janë paraparë të përfundojnë në tremujorin e tretë të vitit të kaluar. Në vitin 2017 janë vlerësuar sektori i lojërave të fatit dhe sektori i ndërtimit dhe pasurive të paluajtshme. Ndërkaq gjatë muajit qershor 2018 është përfunduar vlerësimi i rrezikut në sektorin e OJQ-ve duke kompletuar kështu tri vlerësime të rrezikut. Pas kryerjes së vlerësimit të rrezikut, grupi punues ka miratuar raportet përfundimtare dhe i ka dorëzuar për miratim në Ministrinë e Financave.

7.2) Përveç vlerësimeve sektoriale, është bërë edhe një vlerësim i nivelit të përgjithshëm të ekonomisë joformale me ç’rast në tetor 2017 u krijua Sekretariati i ri i Grupit të Përhershëm për Parandalimin e Ekonomisë Joformale. Raporti përfundimtar i vlerësimit të ekonomisë joformale së bashku me vlerësimet e rrezikut ka shërbyer për hartimin e planit të veprimit për vitin 2018 që u miratua në qershor të këtij viti. Këto të gjetura do të shërbejnë edhe për hartimin e strategjisë së re për luftimin e ekonomisë joformale dhe pastrimin e parave 2019-2024 që do të shqyrtohet gjatë 2018-ës.

7.3) Administrata Tatimore e Kosovës edhe gjatë vitit 2017 ka realizuar të hyra më të mëdha se një vit më parë, por edhe në 2018 deri në fund të marsit ka realizuar të hyra në vlerë afro 80.3 milionë euro, sipas raportimit në MIE për gjashtëmuajorin e parë 2018. Për tremujorin e parë 2018, ka realizuar 7,084 vizita përmes të cilave ka lëshuar 555 gjoba mandatore. Gjithashtu ka pasur rreth gjysmë milioni euro ulje të kreditimit të TVSh-së dhe rreth 2 milionë euro zbritje të humbjes. Ndërsa për këtë periudhë janë realizuar 220 kontrolle dhe afro 9 milionë euro humbje e zbitur. Po ashtu ka realizuar 595 vizita tek bizneset e pa fiskalizuara dhe bizneset të cilat nuk lëshojnë kuponë fiskal me ç’rast janë shqiptuar 171 gjoba mandatore në vlerë rreth 35 mijë euro. Në tre muajt e parë ka pasur 46 aktivitete kundër shmangies tatimore, 29 intervista me të dyshuar dhe dëshmitarë, 67 konsultime me prokurorë dhe ka hapur 10 raste për dyshim të shmangies tatimore. Po ashtu janë këmbyer 22 informata të inteligjencës me NJIF, Policinë dhe Doganën e Kosovës.

7.4) Kosova është anëtarësuar në organizatën Egmont Group të Njësive të Inteligjencës Financiare (Egmont Group of Financial Intelligence Units) në shkurt 2017. Egmont Group është organizatë ndërkombëtare me 152 njësi të inteligjencës financiare të specializuara në luftimin e shpërlarjes së parave dhe financimit të terrorizmit. Përmes anëtarësimit, Njësia e Inteligjencës Financiare e Kosovës (NJIF) ka qasje direkte në uebfaqen Egmont Secure për shkëmbimin ndërkombëtar të informatave të inteligjencës financiare. Numri i kërkesave për bashkëpunim ndërkombëtar është rritur si rezultat i anëtarësimit gjatë vitit 2017, por edhe 2018. Si rrjedhojë, gjatë tremujorit të parë të 2018, NJIF ka pranuar 37 (IRD) kërkesa për informata nga agjencitë zbatuese të ligjit, ndërsa nga ana e NJIF-it, tek entitetet raportuese dhe agjencitë zbatuese të ligjit janë dërguar 69 (ORD) kërkesa për informacione. Ndërkombëtarisht janë pranuar 3 (IRI) kërkesa për informata dhe 3 (ORI) kërkesa për informata ka dërguar NJIF tek homologët ndërkombëtar. Kështu, NJIF ka lëshuar një urdhër për ngrirje në shumë prej afro 230 mijë euro dhe 26 mijë dollarë amerikan ndaj një kompanie vendore. Po ashtu kanë marrë pjesë në takime ndërkombëtare të ndërlidhura me vlerësime të rrezikut si dhe si anëtarë të Egmont Group.

7.5) Raportimi tre-mujor nga Ministria e Financave është dashur të fillojë në vitin 2017. Kjo objektivë është shtyrë që të finalizohet deri në fund të muajit shtator 2018. Megjithatë, sipas raportimit në MIE, raportet për vitin 2015 dhe 2016 janë përgatitur dhe publikuar në ueb-faqen e Ministrisë së Financave. Sipas ueb faqes së MF-së, raporti vjetor financiar 2017 është publikuar në prill. MF ka përpiluar edhe raportin tre-mujor financiar për periudhën janar-mars i publikuar në maj 2018, megjithëse më shumë se një muaj më vonë se përfundimi i tremujorit të parë. Pritet të shihet nëse edhe raportet tremujore të radhës do të publikohen me rregull.

8	Miratimi i pakos ligjore për të përmirësuar infrastrukturën dhe standardet e cilësisë, si dhe funksionalizimi i katër laboratorëve të metrologjisë	8.1) Avancimi dhe përditësimi i rregullt i ueb faqes	MTI	TM3 2018	P
		8.2) Organizimi i 10 punëtorive për informim të bizneseve dhe promovim të ueb faqes	MTI		RS
		8.3) Organizimi i 30 moduleve për zhvillim të kapaciteteve njerëzore sa i përket infrastrukturës dhe standardeve të cilësisë	MTI		RS
		8.4) Miratimi i 1,500 standardeve në fokus në zonën e harmonizuar	MTI		RS
		8.5) Furnizimi i laboratorëve metrologjik ekzistues	MTI		RS
		8.6) Hartimi i Ligjit mbi shërbime dhe konsultimet me shoqërinë civile dhe akterë tjerë relevant	MTI		P
		8.7) Miratimi i Ligjit mbi shërbime	KUVENDI		P
		8.8) Themelimi dhe funksionalizimi i pikës së vetme të kontaktit për shërbime	MTI		RS

Gjendja për periudhën TM1 – TM2 2018

8.1) Ueb-faqja e MTI-së është ridizajnuar dhe mbushur me të dhëna në 2017 dhe vazhdon të përditësohet në baza ditore edhe në 2018. Është një aktivitet në vazhdimësi.

8.2) Organizimi i 10 punëtorive ka filluar në 2016 dhe ka vazhduar në 2017, por nuk kanë përfunduar në tremujorin e katërt të vitit të fundit megjithëse me marrëveshjen me BE-në ashtu ishte paraparë. Në vitin 2017 janë mbajtur tryeza me bizneset në fushën e zbatimit të legjislacionit për ashensorë dhe komponentet e sigurisë; një punëtori për harmonizimin e legjislacionit horizontal për lëvizjen e lirë të mallrave. Gjatë vitit 2018 janë organizuar dy punëtori. Një punëtori për Sigurinë e Lodrave në kuadër të ngritjes së Infrastrukturës së Cilësisë në Republikën e Kosovës si dhe një punëtori për të diskutuar draftin final të Rregullores për Sigurinë e Ashensorëve në Përdorim ku ka pasur përfaqësues të bizneseve të fushës dhe ministrive relevante. Në maj dhe qershor 2018 janë mbajtur konferencë për shënimin e Ditës Botërore të Metrologjisë dhe manifestim për Ditën Botërore të Akreditimit.

8.3) Sa i përket zhvillimit të kapaciteteve njerëzore në fushën e infrastrukturës dhe standardeve të cilësisë janë paraparë që deri në fund të vitit 2017 të përfundohen 30 module. Sipas raportit të MIE-së, nga shtatori në nëntor 2017 janë mbajtur trajnime për zyrtarët e Divizionit për Infrastrukturë të Cilësisë në MTI për:

- Mekanizmat e monitorimit dhe komunikimit në aktivitetet e mbikëqyrjes së tregut në sektorin e pajisjeve elektrike dhe elektronike
- Çështjet teknike të mbikëqyrjes së tregut - Kontrollat në fushën e pajisjeve elektrike dhe elektronike
- Vlerësimi i Ndikimit Rregullativ (RIA) në lidhje me hartimin e strategjive dhe legjislacionit
- Sfidat dhe mundësitë në fushën e pajisjeve elektrike dhe elektronike

Gjatë vitit 2018 zyrtarët e fushave relevante kanë marrë pjesë në trajnime apo takime pune të ndryshme jashtë vendit, si më poshtë:

- Takim pune me institucionet e Infrastrukturës së Cilësisë, organizuar nga projekti Infrastruktura e Cilësisë në Vendet e Ballkanit Perëndimor, financuar nga SIDA në Stockhom
- Takimi i Komitetit Drejtues të Projektit SIDA në Stockholm

- Forumi Regional për Mbikëqyrjen e Tregut në Sarajevë
- Trajnim në lidhje me zbatimin e ISO/IEC 17025:2017 (NE16) në Beograd
- Konferencë për Metrologjinë ligjore (NE17) në Beograd

8.4) Gjatë vitit 2017 janë miratuar 647 standarde si standarde të Kosovës (22 në miniera dhe minerale, 82 në tekstil dhe këpucë të lëkurës, 36 në teknologji agro-ushqimore, 95 në makineri, 107 në energji, 111 në shëndetësi, 34 në metrologji, 143 në përpunim të drurit, 14 në teknologji informative). Ndërkaq gjatë gjashtëmuorit të parë të vitit 2018, Komitetet Teknike në kuadër të Agjencisë Kosovare për Standardizim (AKS) kanë adoptuar 544 standarde evropiane EN dhe ndërkombëtare ISO/IEC, të cilat janë adoptuar si standarde kosovare në fushat si ne vijim: 167 në Mjedis, 74 në Derivate të Naftës dhe Gazit, 1 në Metrologji si dhe 312 në elektroteknikë. Gjithsej për një vit e gjysmë janë miratuar 1191 standarde.

8.5) Ka përfunduar furnizimi me pajisje për 6 laboratorë, atë të presionit, metaleve të çmuara, forcës, matjen e temperaturës dhe lagështisë relative, si dhe laboratorin e kohës dhe frekuencës. Gjithashtu është realizuar edhe trajnimi dy ditor për aftësimin e stafit për përdorimin e laboratorëve në fjalë. Në baza vjetore është duke u bërë furnizimi me pajisje të laboratorëve metrologjik ekzistues. Për vitin 2018, është shpallur tenderi për furnizim me pajisje laboratorike dhe se shpejti pritet të bëhet hapja e ofertave.

8.6/8.7) Hartimi i projektligjit për shërbime, konsultimet dhe miratimi i tij janë kryer gjatë vitit 2017. Ligji është miratuar dhe publikuar në gazetën zyrtare me 3 prill 2017.

8.8) Udhëzimi Administrativ për Mënyrën e Funkcionimit të Pikës së Vetme të Kontaktit është hartuar në 2017, por është miratuar nga Qeveria më 16 mars 2018. Por, pika e vetme e kontaktit ende nuk është funksionalizuar.

9	Zbatimi i prokurimit elektronik në prokurimet e centralizuara	9.1) Zbatimi i prokurimit elektronik në prokurimet e centralizuara vazhdon	MF	TM3 2018	P
----------	---------------------------------------------------------------	-----------------------------------------------------------------------------------	----	----------	---

Gjendja për periudhën TM1 – TM2 2018

9.1) Gjatë vitit 2017, janë zbatuar ndryshimet e ligjit të prokurimit në platformën elektronike, janë trajnuar e certifikuar zyrtarët në nivel lokal dhe qendror si dhe qeveria ka filluar publikimin e të dhënave standard të kontratave të prokurimit. Të gjitha veprimet e parapara janë përfunduar. Tenderimi në vlera të mëdha dhe të mesme është duke u kryer në mënyre elektronike.

III. STATISTIKAT

MASA	VEPRIMET	INSTIT. PËRGJEGJËS	PERIUDHA	GJENDJA	
10	Zhvillimi i statistikave sektoriale të biznesit, energjisë dhe atyre sociale	10.1) Vonesat e publikimit, të reduktuara për PBB-të vjetore dhe tremujore përkatëse dhe statistikave të llogarive të qeverisë, përfshirë këtu publikimin në kohë të statistikave financiare të qeverisë me metodologjinë e ESA 2010	ASK	TM3 2018	P
	10.2) Prodhimi dhe publikimi i statistikave afatshkurtra të biznesit, të përmirësuar (vëllimit të prodhimit industrial dhe indekset e çmimeve)	ASK	P		

		10.3) Rezultatet nga statistikat e Anketës së Fuqisë Punëtore, të shpërndara në baza tremujore, dhe cilësia e tyre, e përmirësuar;	ASK		P
		10.4) Anketa mbi të ardhurat dhe kushtet e jetesës	ASK		P
		10.5) Publikimi i statistikave të energjisë, të reduktuara dhe statistikat vjetore të efikasitetit të energjisë, të prodhuara në përputhje me standardet ndërkombëtare	ASK		RS

Gjendja për periudhën TM1 – TM2 2018

10.1) Aktualisht, BPV publikohet rregullisht në baza tremujore (kuartale) sipas metodologjisë së ESA2010 dhe sipas kalendarit të Eurostat-it (T+ 90 ditë). Poashtu, afati për publikimin e BPV vjetore është shkurtuar. Llogaritë qeveritare për tremujorin e parë 2018 janë publikuar më 22 qershor 2018. Publikimet e mësipërme bëhen në përputhje me ESA 2010 ku metodologjia është zbatuar rreth 36%.

10.2) Statistikat dhe publikimi i prodhimit industrial është dashur të finalizohen në fund të vitit 2017. Mirëpo, në 2017 janë publikuar të dhëna vetëm për qarkullimin në prodhimin industrial sipas aktiviteteve ekonomike. Agjencia e Statistikave të Kosovës (ASK) ka publikuar për herë të parë parë rezultatet e Statistikave Afatshkurtra të Industrisë, më 29 qershor 2018, i cili përfshin indeksin e vëllimit industrial për tremujorin e parë (TM1) 2018 (2017=100). Ndërsa, më 12 mars 2018, u publikua indeksi i harmonizuar i çmimeve të konsumit për vitin 2017.

10.3) Nga fillimi i prillit deri më 5 dhjetor 2017, ASK ka publikuar katër Anketa të Fuqisë Punëtore (AFP) në baza vjetore dhe tremujore sipas afatit të paraparë në Kalendarin e Publikimeve të ASK-së, thuhet në raportin e MIE. AFP-ja për tremujorin e katërt 2017 është publikuar më 19 mars 2018 dhe të dhënat vjetore u publikuan më 30 mars 2018. Sa i përket të dhënave të AFP-së për tremujorin e parë 2018 janë publikuar më 18 qershor 2018, ku shohim se iu janë dashur vetëm 18 ditë deri në publikim që tregon përmirësim në shpejtësinë e shpërndarjes së të dhënave.

10.4) Gjatë periudhës 1 prill - 30 nëntor 2017, janë realizuar aktivitetet përgatitore dhe planifikimi i kohës dhe resurseve për zhvillimin e anketës në terren. Anketa e Buxhetit të Ekonomive Familjare (ABEF) për vitin 2017 është publikuar në uebfaqen e ASK-së më 12 qershor 2018.

10.5) Të dhënat e Anketës së Konsumit të Energjisë në Ekonomitë Familjare janë inkorporuar në Bilancin e Energjisë për vitin 2016. Më 14 shkurt 2017, u publikua bilanci i energjisë për tremujorin e katërt. Afati i publikimit të statistikave të energjisë është shkurtuar për 8 ditë krahasuar me vitin 2016. Statistikat e efikasitetit të energjisë për 2011-2016 (për sektorin e industrisë dhe ekonomive familjare) u publikuan për herë të parë më 9 mars 2018, ndërsa për sektorin e shërbimeve dhe të transportit do të publikohen në një periudhë të mëvonshme. Sipas vendimit të fundit të kryeministrit, këto duhet kryer deri në fund të shtatorit të këtij viti.

IV. AGJENDA E INTERKONEKTIVITETIT

11	Zbatimi i të gjitha “masave të buta” në kuadër të agjendës së interkonvektivitetit	11.1) Miratimi i Legjislacioni dytësor që rrjedh nga ai primar	MZHE ZRRE KOSTT	TM3 2018	P
		11.2) Krijimi i Tregut të përbashkët energjetik me Shqipërinë	MZHE ZRRE KOSTT		RS

	11.3) Krijimi i Tregut të aksioneve energjetike me Shqipërinë - KOSTT (një ditë përpara dhe brenda ditës)	MZHE ZRRE KOSTT		RS
	11.4) Zbatimi i Marrëveshjes ndërmjet KOSTT-EMS	MZHE ZRRE KOSTT		RS
	11.5) Harmonizimi i Kodit të rrjetit të KOSTT me atë të ENTSO-E.	MZHE ZRRE KOSTT		RS

Gjendja për periudhën TM1 – TM2 2018

11.1) Tërë legjislacioni dytësore është harmonizuar sipas Ligjeve primare të energjisë dhe është duke u zbatuar nga prill/maj 2017. Po ashtu, më 29 mars 2018, Qeveria ka miratuar Rregulloren për 'One-Stop-Shop për energjinë e ripërtëritshme.

Rregulla për vendosjen e çmimeve të operatorit të sistemit të shpërndarjes është miratuar në shkurt 2017. Rregulla për vendosjen e çmimeve të furnizuesit publik të energjisë elektrike nuk ekziston më, dhe është zëvendësuar nga "Metodologjia për përcaktimin e çmimit të ofrimit të shërbimeve universale", e cila është miratuar në prill 2017. Rregulla për vendosjen e çmimeve të operatorit të sistemit të transmisionit është miratuar në shkurt 2017.

11.2/11.3/11.4) Sipas raportit të MIE, Republika e Kosovës ka investuar në ndërtimin e linjës së interkoneksionit 400kV me Shqipërinë. Megjithatë, përderisa KOSTT nuk është i pavarur për operimin e sistemit transmetues, kjo linjë nuk mundet të hyjë në funksion për shkak të humbjeve të mëdha. Kjo çështje mbetet peng i moszbatimit të marrëveshjes së arritur me palën serbe në Bruksel nga ana e Serbisë. Komitetit të Energjisë së fundmi i është kërkuar nga Qeveria Gjermane fasiliteti i negociatave mes KOSTT dhe EMS për shkak të vonësive të mëdha në operacionalizimin e linjës së interkoneksionit.

Sipas raportit të MIE, Furnizuesit e rinj për energji elektrike në Republikën e Kosovës janë:

- "KESC" j.s.c
- "HEP-KS" sh.p.k
- "GSA ENERGY" sh.p.k
- "SHARRCEM" sh.p.k
- "JAHA Company" sh.p.k
- Future Energy Trading and Exchange Dynamics" sh.p.k

11.5) Sipas raportit të MIE, bazuar në vendimet e Komunitetit të Energjisë, KOSTT ka transpozuar dispozitat nga Demand Connection Code (Rule 2016/1388) (shq. Kodi i Lidhjes së Kërkesës) dhe Requirements for Grid Connection of Generators (Rule 2016/631) (shq. Kërkesat për lidhjen në rrjet të gjeneratorëve) në Kodin e Rrjetit të KOSTT. KOSTT këtë proces e ka përfunduar. Draft versioni me transpozimet përkatëse i këtij Kodi është dërguar për shqyrtim/aprovim në Komisionin Qeverisës të Kodeve Operacionale (KQKO) dhe në fund dërgohet për aprovim në ZREE.

V. ENERGJIA

MASA	VEPRIMET	INSTIT. PËRGJEGJËS	PERIUDHA	GJENDJA
12	12.1) Miratimi i strategjisë së energjisë 2017-2026 nga Kuvendi	MZHE	TM1 2018	P
	12.2) Miratimi i programit të zbatimit të strategjisë së energjisë 2018-2020	MZHE		PJ
	12.3) Investimet e reja në gjenerimin e energjisë	MZHE		PJ
	12.4) Hartimi dhe miratimi i planit të veprimit për burimet e ripërtëritshme të energjisë	MZHE		PJ
	12.5) Krijimi i fondit për Eficiencë të Energjisë	MZHE		P
Gjendja për periudhën TM1 – TM2 2018				
<p>12.1) Kuvendi i Kosovës ka miratuar Strategjinë e Energjisë të Republikës së Kosovës 2017-2026 më 26 janar 2018. Strategjia u miratua me 41 vota për, 18 kundër dhe 9 abstenime. Strategjia ka dy objektiva kryesore: a) Sigurimi i furnizimit të qëndrueshëm dhe cilësor me energji elektrike dhe me kapacitete të nevojshme për një sistem stabil të energjisë elektrike dhe b) Integrimi në tregun rajonal të energjisë. Ministri i Zhvillimit Ekonomik, Valdrin Lluka, ka prezantuar strategjinë e energjisë për periudhën 2017-2026, e cila sipas tij, synon krijimin e një sektori të zhvilluar të energjisë të padëmshëm për shëndetin.</p> <p>12.2) Programi për zbatimin e strategjisë së energjisë ka filluar në shkurt 2018 (menjëherë pas miratimit të strategjisë së energjisë 2017-2026) dhe si i tillë ka përfunduar tashmë dokumenti, ka kaluar të gjitha fazat e konsultimit publike (nga 14 maj deri më 1 qershor 2018) dhe janë marrë deklaratat/opinionet nga MIE, MF dhe zyra për planifikim strategjik. Dokumenti është duke u përgatitur tashmë për dërgim në qeveri për miratim. Meqenëse nuk është miratuar në 2017 siç ishte paraparë, programi për zbatim tani përfshin periudhën 2018-2020.</p> <p>12.3) Në bazë të informacioneve nga ZRRE, MZHE raporton investimet në kuadër të burimeve të ripërtëritshme të energjisë:</p> <ul style="list-style-type: none"> • Hidrocentrale me autorizime finale që kanë hyre në operim, me kapacitet të instaluar janë: 31.25 MW. • Në proces janë edhe kapacitetet e bazuara në autorizimet finale që janë lëshuar nga ZRRE për kapacitet prej 61.9 MW – Hidroenergji • Energjia diellore fotovoltaike- në operim janë kapacitetet prej 0.6 kW dhe • Energjia e erës- Në operim është kapaciteti prej 1.35, kurse autorizimi përfundimtar është lëshuar për kapacitetin prej 32.4 MW. <p>12.4) Sipas MZHE-së, plani i veprimit për burimet e ripërtëritshme të energjisë (i rishikuar) është draftuar, është përkthyer në të tri gjuhët, është formatizuar dhe tashmë gjendet në fazën e konsultimit publik. Konsultimi publik do të zgjat nga 12 korriku deri më 1 gusht 2018, që do të thotë do të përfundojë në tremujorin e tretë. Posa të përfundojë kjo fazë e konsultimit do të procedohet tutje për marrje të opinionëve dhe miratim në qeveri. Megjithatë, sipas vendimit të Kryeministrit, miratimi i planit ka qenë i paraparë të përfundojë deri më 30 mars 2018.</p> <p>12.5) Fondi për Eficiencë të Energjisë është pjesë e projekt ligjit për Eficiencë të Energjisë i cili tashmë është në procedura parlamentare për miratim. Ky Ligj përcakton kornizën ligjore të domosdoshme për promovimin dhe përmirësimin e efikasitetit të energjisë në Republikën e Kosovës. Ky Ligj rregullon aktivitetet që kanë për qëllim zvogëlimin e intensitetit energjetik në ekonominë kombëtare dhe që i kontribuojnë zvogëlimin të ndikimit negativ në mjedis të aktivitetëve që ndërlidhen me sektorin e energjisë. Meqenëse ligji nuk është miratuar atëherë as fondi relevant nuk është krijuar.</p>				

Tabela 5. Masat dhe veprimet për shtyllën Konkurrueshmëria dhe Klima e Investimeve

PUNËSIMI DHE ARISMI

Në shtyllën e tretë janë paraparë të realizohen gjashtë masa, me gjithsej 27 veprime. Prej 27 veprimeve të identifikuar, gjashtë veprime apo 22.2% e tyre janë plotësuar në tërësi, 10 veprime apo 37% janë realizuar pjesërisht, gjashtë veprime apo 22.2% e tyre mbesin të paplotësuara dhe pesë veprime apo 18.5% janë paraparë për periudha kohore më të mëvonshme.

Këto gjashtë masa janë të ndara në dy kategori:

- I. Punësimi
- II. Arsimi

INFORMATA PËR SECILËN MASË NË VEÇANTI

Masa 1: Tre veprime (42%) janë plotësisht të plotësuara dhe dy (29%) janë pjesërisht të plotësuara, ndërsa dy veprime (29%) tjera të parapara për TM3 2018 janë në realizim e sipër. Ka progres, por nevojitet miratimi i rregulloreve të punës për Agjencinë e Punësimit si dhe përdorimin e analizës me qëllim të zvogëlimit të nivelit të papunësisë tek gratë.

Masa 2: Kjo masë është realizuar në tërësi (100%), plani i veprimit dhe buxheti kanë përfunduar me sukses.

Masa 3: Kjo masë konsiston me tre veprime dhe të gjitha janë në realizim e sipër sepse pritet të realizohen në TM3 2018. Veprimet përfshijnë miratimin e pakos ligj

ore, rritjen e vijueshmërisë në arsimin parashkollor dhe zhvillimin dhe zbatimin e kurrikulave në disa klasë.

Masa 4: Kjo masë nga tre veprime, një veprim është plotësisht e plotësuar (33%), një është pjesërisht e plotësuar (33%) dhe një mbetet e paplotësuar (33.33%). Procesi i miratimit të projektligjit të Arsimit të Lartë vazhdon të ketë vonesa.

Masa 5: Në këtë masë janë pesë veprime pjesërisht të plotësuara (71%) ndërsa pjesa tjetër është e pa plotësuar (29%). Asnjë veprim nuk ka mbaruar në përputhje me afatet kohore, prandaj kjo masë konsiderohet si ngecja në këtë shtyllë.

Masa 6: Në këtë masë nga pesë veprime, dy janë plotësuar pjesërisht (40%) dhe tre veprime janë te pa plotësuara (60%). Që kjo masë të plotësohet dhe të hapet rruga për implementimin dhe krijimin e programeve të ndryshme nevojitet hartimi i kurrikulave bërthamë të AAP-së.

PUNËSIMI DHE ARSIMI									
REZULTATET PËR MASAT E PARAPARA									
MASAT	VEPRIMET	E PLOTËSUAR	%	PJESËRISHT E PLOTËSUAR	%	E PAPLOTËSUAR	%	NË REALIZIM E SIPËR	%
1	7	3	42.86%	2	28.57%		-	2	28.57%
2	2	2	100%	-	-	-	-	-	
3	3	-	-	-	-	-	-	3	100%
4	3	1	33.33%	1	33.33%	1	33.33%	-	
5	7	-	-	5	71.43%	2	28.57%	-	
6	5	-	-	2	40%	3	60%	-	
TOTALI	27	6	22.22%	10	37.04%	6	22.22%	5	18.52%

Tabela 6. Gjendja statistikore për shtyllën Punësimi dhe Arsimi.

PUNËSIMI DHE ARSIMI

I. PUNËSIMI

MASA	VEPRIMET	INSTIT. PËRGJEGJËS	PERIUDHA	GJENDJA
1	Përmirësimi i mundësive të punësimit, me fokus punësimin e të rinjëve dhe grave.	MPMS	TM1 2017	P
			TM1 2017	PJ
			TM1 2017	P
			TM2 2017	P
			TM3 2017	PJ
			TM3 2018	RS
			TM3 2018	RS

Gjendja për periudhën TM1 – TM2 2018

1.1) Realizimi i një vlerësimi të nevojave të tregut të punës (përfshirë mbi AAP) ka përfunduar më herët dhe parashihet të përdoret për qëllimet e definuara në pikën e sigurimit për zbatimin të ligjit mbi Agjencinë e Punësimit.

1.2) Projekt-rregullorja është hartuar për punën e Bordit Këshillëdhënës të Agjencisë së Punësimit, më datën 26.06.2018 dhe është dërguar në MIE për opinion ligjor rreth përputhshmërisë me legjislacionin e BE-së dhe ka përfunduar të gjitha procedurat e parapara.

1.3) Asistenca përfshinë subvencion në pagë, punë publike, vetëpunësim, praktikë, trajnim dhe aftësim profesional. Për periudhën TM1 2018, numri i përfshirjes së grave në masat aktive të tregut të punës është 705. Në periudhën TM2 2018, numri është rritur në 1337.

1.4) Hulumtimi është kryer nga Korporata e Sfidave të Mijëvjeçarit (MCC), ku përfshihet edhe çështja e papunësisë së grave. Rezultatet e këtij hulumtimi do të përdoren nga MPMS, për hartimin e politikave të punësimit dhe aftësimin profesional.

1.5) Të gjeturat e hulumtimit do të përdoren për hartimin e Politikës së Punësimit 2019-2021, proces i cili ka filluar dhe do të përfundoj në fund të 2018. Synimi është që krijohen targete specifike për Agjencinë e Punësimit lidhur me punësimin e grave si në tregun e punës edhe në masa aktive të tregut të punës.

Vlerësim:

- Drejtori i Përgjithshëm i APRK-së është zgjedhur, poashtu edhe Bordi i APRK është formuar (këto dy procese kanë përfunduar qysh moti), ndërsa është në fazën e nënshkrimit. Ka kaluar një vit pa ndodhë asgjë konkrete, prandaj konsiderohet si e pa plotësuar.
- Ka progres sa i përket rritjes së numrit të grave në tregun e punës. Por, kjo nuk do të thotë që numri aktual është i kënaqshëm prandaj konsiderojmë se duhet të vazhdohet me rritjen e asistencës.
- Procesi i hartimit të Politikave të Punësimit 2019-2021 ka filluar, të dhënat e së cilës janë duke u marrë parasysh por nuk mund ta konsiderojmë të plotësuar sepse nuk është respektuar afati kohor. Ky veprim ka qenë e paraparë të përfundoj vitin e kaluar.

2	Miratimi dhe zbatimimi i Strategjisë Sektoriale për Punësimin dhe Politikën Sociale 2015-2020 dhe miratimi i Planit të Veprimit 2017-2018 për zbatimin e strategjisë	2.1) Strategjia Sektoriale dhe Plani i saj i Veprimit, të miratuara.	MPMS MKRS MASHT	TM2 2017	P
		2.2) Buxheti për zbatimin e strategjisë është ndarë.			P

Gjendja për periudhën TM1 – TM2 2018

2.1) MPMS ka hartuar draft Strategjinë Sektoriale 2018-22 si dhe Planin e Veprimit 2018-22. Dokumenti është miratuar në qeverinë e Kosovës me datën 28.02.2018.

2.2) MPMS ka mbaruar të gjitha procedurat, përfshirë këtu ndarjen e buxhetit të paraparë.

II. ARSIMI

MASA	VEPRIMET	INSTIT. PËRGJEGJËS	PERIUDHA	GJENDJA
3	3.1) Miratimi i pakos ligjore për reformën në sektorin e arsimit;	MASHT QEVERIA	TM3 2018	RS
	3.2) Rritja e vijueshmërisë në arsimin parashkollor;	MASHT	TM3 2018	RS
	3.3) Zbatimimi i kurrikulës së bazuar në kompetencë për klasat 0, 1, 2, 6, 7, 11 dhe zhvillimi i kurrikulave për klasat 3, 8 dhe 12.	MASHT	TM3 2018	RS

Gjendja për periudhën TM1 – TM2 2018

3.1) Projektligji për Arsimin e Lartë ka kaluar fazën e diskutimit publik dhe tani është në fazën e shqyrtimit të komenteve nga grupi punues.

3.2) IPA dhe MASHT është në finalizim e sipër të ndërtimit të 6 çerdheve publike, 2 prej të cilave janë në proces të ndërtimit.

3.3) Nga viti shkollor 2017/18 në të gjitha shkollat e Kosovës, janë duke u zbatuar korniza e kurrikulës së Arsimit Parauniversitar, kurrikulat bërthamë për 3 nivelet e Arsimit formal (niveli I klasa 0,1-5, niveli II, klasat 6-9, niveli III, klasa 10-12) si dhe plan programet lëndore për klasën përgatitore 1, 6 dhe 10. Në vitin shkollor 2018/19 programet lëndore për klasat 2, 7 dhe 11 do të jenë pjesë e zbatimit të reformës në të gjitha shkollat e Kosovës.

4	Miratimi i legjislacionit të mbetur që ofron bazën për reforma të politikave në sektorin e arsimit.	4.1) Miratimi i Projektligjit të rishikuar mbi arsimin e lartë,.	MASHT	TM1 2017	PJ
		4.2) Miratimi i Plani Strategjik të Arsimit në		TM4 2016	P
		4.3) Ndarja buxhetit të nevojshëm për të siguruar zbatimin e PSAK.		TM4 2016	PA

Gjendja për periudhën TM1 – TM2 2018

4.1) Projektligji i Arsimit të Lartë është finalizuar dhe ka kaluar procedurat e diskutimit publik. Janë pranuar komentet nga grupet e interesit dhe te njëjtat do t'i shqyrtojë grupi punues.

4.2) Ka filluar zbatimi i PSAK-ut 2017-21.

4.3) Zbatimi i PSAK-ut ka filluar zbatohet me një deficit buxhetor në vlerë prej 44 milionë EURO.

Vlerësim:

Zbatimi i PSAK-ut mund të ketë probleme si pasojë e deficitit buxhetor, prandaj është përgjegjësi e qeverisë të shpërndajë buxhetin e paraparë.

5	Përmirësimi i cilësisë në arsim	5.1) Rritja e numrit të objekteve publike për kujdesin ndaj fëmijëve të moshës 0-5 vjeç.	MASHT	TM3 2017	PJ
		5.2) Korniza e Kurrikulës Bërthamë për Arsimin Para-Universitar dhe syllabusi për klasat dhe lëndët është shqyrtuar dhe aprovuar me zbatimin të mëposhëm në të gjitha shkollat, duke filluar nga viti shkollor 2017/2018;		TM4 2017	PJ
		5.3) Mekanizmat për sigurimin e cilësisë të zhvilluara përmes emërimit të koordinatoreve të cilësisë në shkolla dhe krijimit të sistemit efikas për vlerësimin e performancës në shkolla;		TM2 2017	PJ
		5.4) Agjencia për Kurrikulë, Standarde dhe Vlerësim është themeluar dhe është plotësisht funksionale;		TM2 2017	PA

		5.5) Projektligji i rishikuar mbi inspektoratin e arsimit në Kosovë është miratuar nga Kuvendi dhe inspektorët kanë filluar aktivitetet e tyre, me inspektorë dhe kapacitete të mjaftueshme;		TM4 2017	PJ
		5.6) Krijimi dhe funksionalizimi i Këshillave Industriale;		TM2 2017	PJ
		5.7) Shqyrtimi i programeve studimore dhe politikave të regjistrimit.		TM3 2017	PA

Gjendja për periudhën TM1 – TM2 2018

5.1) Është kryer verifikimi i lokacioneve për ndërtimin e 6-të çerdheve të cilat do të financohen përmes fondeve të IPA II, 2016 me pjesëmarrje të MASHT. Nga këto 6 çerdhe, 2 janë në proces të ndërtimit në Kaçanik dhe Shtime, me financim të buxhetit të Kosovës është duke vazhduar ndërtimi i një çerdhe në Rahovec, gjithashtu është në procedurë të lidhjes së kontratës në MAP edhe ndërtimi i një çerdhe në Prizren. Po ashtu, është planifikuar ndërtimi i 2 çerdheve tjera në Prishtinë dhe Klinë.

5.2) Procesi i hartimit të plan programit bërthamë për edukim në fëmijërinë e hershme është në fazën e finalizimit, pasi i ka kaluar të gjitha procedurat e parapara të diskutimit publik (27.04.18 - 21.05.2018). Janë marrë komentet dhe pritjet miratimi i saj. Pilotimi i tyre planifikohet të fillojë në Shtator 2018.

5.3) Procesi i vlerësimit të jashtëm ka filluar në Tetor 2017, ku janë planifikuar edhe shkollat të cilat do t'i nënshtrohen procesit të vlerësimit. Planifikimi është bërë nga inspektorët e arsimit, në gjithsej 48 shkolla të arsimit para universitar. Janë emëruar gjithsej 200 koordinatorë për sigurimin e cilësisë në të gjitha shkollat, dhe 24 koordinatorë në nivel të drejtorive komunale të arsimit.

5.4) Në Mars 2018 është punuar në UA për themelimin e agjencionit me përkrahje të projektit ESIP të Bankës Botërore. Ky udhëzim parashihet të miratohet në Nëntor 2018. Andaj, Agjencia për Kurrikulë, Standarde dhe Vlerësim nuk është themeluar dhe nuk është funksionale.

5.5) Projektligji për Inspektoratin i ka kaluar të gjitha procedurat dhe tani do të kalojë për lexim të dytë dhe miratim në Kuvend.

5.6) Universiteti i Prishtinës, në 10 njësi akademike, ka themeluar 10 trupa këshillëdhënës; Universiteti i Ferizajit, ka themeluar 1 bord industrial; Universiteti i Gjakovës ka themeluar 2 trupa këshillëdhënës; Universiteti i Mitrovicës është në fazën e parë të hartimit të rregullores për trupat këshillëdhënës; Universiteti i Pejës ka themeluar 3 borde industriale; dhe Universiteti i Gjilanit ka miratuar rregulloren por ende nuk ka themeluar trupat këshillëdhënës.

5.7) Janë proceduar ankesat e institucioneve të arsimit të lartë, të cilat ishin mbetur të pa përfunduar nga mbledhja e 53-të e KSHC, dhe janë lëshuar vendime për ato.

Vlerësim:

Masat a parapara në vitin e kaluar (2017) janë ende në pritje për finalizimin e tyre dhe kjo mund të shkaktojë dilema se a do të fillojë zbatimi i tyre në vitin shkollor 2018/19.

6	Përmirësimi i cilësisë së Arsimit dhe Aftësisimit Profesional (AAP) dhe kalimit nga shkolla në punë	6.1) Vlerësimi i Nevojave të Tregut të Punës;	MASHT	TM1 2017	
		6.2) Shqyrtimi i profileve të ofruara në shkollat e AAP-së;		TM3 2017	

			KKK Agjencia e Punësimit		
		6.3) Hartimi i kurrikulave bërthamë për AAP dhe fillimi i fazës së pilotimit;		TM2 2017	
		6.4) Sigurimi i financimit të duhur për qendrat e AAP-së;		TM3 2017	
		6.5) Zgjerimi dhe përfshirja në programet studimore		TM3 2017	
Gjendja për periudhën TM1 – TM2 2018					
<p>6.1) GIZ ka filluar një hulumtim në 68 shkolla profesionale dhe institucione tjera. Të gjeturat e raportit do të prezantohen në Tetor 2018, pastaj do të bëhet hulumtimi i tregut të punës.</p> <p>6.2) Është bërë hulumtimi i disa profileve si: përpunimi i ushqimit dhe paketimit, kontraktimi i shërbimeve jashtë vendit për teknologji informative dhe qendra të mbështetjes së konsumatorëve, përpunimin e metalit, tekstilit, turizmit dhe drurit. Janë nënshkruar marrëveshje me bizneset e përpunimit të drurit dhe shërbime dhe shitje. Gjithashtu, është realizuar panairi i punësimit.</p> <p>6.3) Është draftuar projekt propozimi si dhe diskutimi publik me donatorët por ende nuk ka mbaruar hartimi i saj.</p> <p>6.4) Është bërë analiza e kostos për disa profile (ekonomi, shëndetësi, etj) në bashkëpunim me Bankën Botërore dhe GIZ, por nuk është siguruar financimi.</p> <p>6.5) Nuk ka filluar zgjerimi për programet studimore.</p> <p>Vlerësim: Pas hartimit të kurrikulave bërthamë pritet të krijohen profile përkatëse në fusha të ndryshme. Pa miratim nuk mund të fillojë faza e pilotimit.</p>					

Tabela 7. Masat dhe veprimet për shtyllën Punësimi dhe Arsimi.

Ky projekt është mbështetur nga:



Embassy of the
Kingdom of the Netherlands

Ky publikim është pjesë e projektit me titull “Mekanizmi i Monitorimit të Agjendës për Reforma Evropiane”, që financohet nga Ambasada e Mbretërisë së Holandës në Kosovë, dhe implementohet nga Grupi për Studime Juridike dhe Politike, Instituti GAP, dhe Instituti i Prishtinës për Studime Politike.



GROUP FOR LEGAL
AND POLITICAL
STUDIES

INSTITUTI GAP
GAP INSTITUTE

